



脈經卷之七

病不可發汗證第

病可發汗證第二

病發汗以後證第

病不可吐證第四

病可吐證第五



病不可下證第六

病可下證第七

病發汗吐下以後證第八

病可溫證第九

病不可灸證第十



月系  
病可灸證第十一

病不可刺證第十二

病可刺證第十三

病不可水證第十四

病可水證第十五

病不可火證第十六

病可火證第十七

熱病陰陽交并少陰厥逆陰陽竭盡生死證第十八

重實重虛陰陽相附生死證第十九

熱病生死期日證第二十

熱病十逆死日證第二十一

熱病五藏氣絕死日證第二十二

熱病至脈死日證第二十三

熱病損脈死日證第二十四

病不可發汗證第一

少陰病脈細沉數病爲在裏不可發其汗

脈浮而緊法當身體疼痛當以汗解假令尺中脈遲者不可發其汗何以知然此爲榮氣不足血微少故也

少陰病脈微

一作濡而微弱

不可發其汗無陽故也

脈濡而弱弱反在關濡反在顛微反在上澀反在下微則陽氣不足澀則無血陽氣反微中風汗出而反躁煩澀則無血厥而且寒陽微發汗躁不得眠



動氣在右不可發汗發汗則衄而渴心苦煩飲即吐水

動氣在左不可發汗發汗則頭眩汗不止筋惕肉瞤

動氣在上不可發汗發汗則氣上衝正在心端

動氣在下不可發汗發汗則無汗心中大煩骨節苦疼目運

惡寒食即反吐穀不得前不消化

咽中閉塞不可發汗發汗則吐血氣微絕手足逆冷欲得蹠

臥不能自溫

諸脈數動微弱並不可發汗發汗則大便難腹中乾一云小便難胞

中胃燥而煩其形相象根本異源

脈濡而弱弱反在關濡反在顛弦反在上微反在下弦爲陽

遲微爲陰寒上實下虛意欲得溫微弦爲虛不可發汗發汗

則寒慄不能自還欬者則劇數吐涎沫咽中必乾小便不利  
心中飢煩晬時而發其形似瘧有寒無熱虛而寒慄欬而發  
汗踈而苦滿

滿一作心痛

腹中復堅

厥不可發汗發汗則聲亂咽嘶舌痿穀不得前

諸逆發汗微者難愈劇者言亂睛眩者死命將難全

太陽病得之八九日如瘧狀發熱而惡寒熱多寒少其人不  
嘔清便續自可一日再三發其脈微而惡寒此爲陰陽俱虛  
不可復發汗也

太陽病發熱惡寒熱多寒少脈微弱則無陽也不可復發其  
汗

咽乾燥者不可發汗

亡血家不可攻其表汗出而寒慄而振

衄家不可攻其表汗出必額陷脈上促急而緊直視而不能  
眴不得眠

汗家重發其汗必恍惚心亂小便已陰疼可與禹餘糧丸  
淋家不可發汗發其汗必便血

瘡家雖身疼痛不可攻其表汗出則瘡

一作瘡下同

冬時發其汗必吐利口中爛生瘡

下利清穀不可攻其表汗出必脹滿

欬而小便利若失小便不可攻其表汗出則厥逆冷汗出多  
堅發其汗亦堅

傷寒一二日至四五日厥者必發熱前厥者後必熱厥深者

熱亦深厥微者熱亦微厥應下之而反發其汗必口傷爛赤  
病人脈數數爲有熱當消穀引食反吐者醫發其汗陽微膈  
氣虛脈則爲數數爲客陽不能消穀胃中虛冷故令吐也  
傷寒四五日其脈沉煩而喘滿脈沉者病爲在裏反發其汗  
津液越出大便爲難表虛裏實久則譫語

傷寒頭痛翕翕發熱形象中風常微汗出又自嘔者下之益  
煩心懊憹如飢發汗則致瘥身強難以屈伸熏之則發黃不  
得小便久則發欬唾

太陽病發其汗因致瘥

傷寒脈弦細頭痛而反發熱此屬少陽少陽不可發其汗  
太陽與少陽併病頭項強痛或眩冒時如結胃心下痞堅者

不可發其汗

少陰病欬而下利譫語者此被火氣劫故也小便必難以強責少陰汗也

少陰病但厥無汗而強發之必動其血未知從何道出或從口鼻或從目出者是爲下厥上竭爲難治

傷寒有五皆熱病之類也

○按袁本此下有其形相象根本異源二句

同病異名

同脈異經病雖俱傷於風其人自有固疾則不得同法其人

素傷於風因復傷於熱風熱相薄則發風溫四肢不收頭痛

身熱常汗出不解治在少陰厥陰不可發汗汗出譫言獨語

內煩燥擾不得臥善驚目亂無精治之復發其汗如此者醫

殺之也

傷寒濕溫其人常傷於濕因而中暍濕熱相薄則發濕溫病苦兩脛逆冷腹滿又胸頭目痛苦妄言治在足太陰不可發汗汗出必不能言耳聾不知痛所在身青面色變名曰重暍如此者醫殺之也

右二首  
出醫律

### 病可發汗證第二

大法春夏宜發汗

凡發汗欲令手足皆周至熱熱一時間益佳但不欲如水流離若病不解當重發汗汗多則亡陽陽虛不得重發汗也

凡服湯藥發汗中病便止不必盡劑也

凡云可發汗而無湯者丸散亦可用要以汗出爲解然不如湯隨證良

太陽病外證未解其脈浮弱當以汗解宜桂枝湯

太陽病脈浮而數者可發其汗屬桂枝湯證

陽明病脈遲汗出多微惡寒表爲未解可發其汗屬桂枝湯證

夫病脈浮大問病者言便堅耳設利者爲虛大逆堅爲實汗出而解何以故脈浮當以汗解

傷寒其脈不弦緊而弱弱者必渴被火必譫語弱者發熱脈浮解之當汗出愈

病者煩熱汗出卽解復如瘧狀日晡所發熱此屬陽明脈浮虛者當發其汗屬桂枝湯證

病常自汗出此爲榮氣和榮氣和而外不解此衛不和也榮

行脈中爲陰主內衛行脈外爲陽主外復發其汗衛和則愈  
屬桂枝湯證

病人藏無他病時發熱自汗出而不愈此衛氣不和也先其  
時發汗則愈屬桂枝湯證

脈浮而緊浮則爲風緊則爲寒風則傷衛寒則傷榮榮衛俱  
病骨節煩疼可發其汗宜麻黃湯

太陽病不解熱結膀胱其人如狂血必自下下者卽愈其外  
未解者尙未可攻當先解其外屬桂枝湯證

太陽病下之微喘者表未解故也屬桂枝加厚朴杏子湯證  
傷寒病脈浮緊不發其汗因衄屬麻黃湯證

陽明病脈浮無汗其人必喘發其汗則愈屬麻黃湯證



太陰病脈浮者可發其汗屬桂枝湯證

太陽病脈浮緊無汗而發熱其身疼痛八九日不解表候續在此當發其汗服湯微除發煩目瞋劇者必衄衄乃解所以然者陽氣重故也屬麻黃湯證

脈浮者病在表可發其汗屬桂枝湯證

一云麻黃湯

傷寒不大便六七日頭痛有熱與承氣湯其大便反青

一作小便

清此爲不在裏故在表也當發其汗頭痛者必衄屬桂枝湯

證

下利後身體疼痛清便自調急當救表宜桂枝湯

太陽病頭痛發熱汗出惡風若惡寒屬桂枝湯證

太陽中風陽浮而陰濡弱浮者熱自發濡弱者汗自出齎齎

惡寒淅淅惡風翕翕發熱鼻鳴乾嘔屬桂枝湯證

太陽病發熱汗出此爲榮弱衛強故使汗出欲救邪風屬桂枝湯證

太陽病下之氣上撞可與桂枝湯不撞不可與之

太陽病初服桂枝湯而反煩不解者法當先刺風池風府却與桂枝湯則愈

燒鍼令其汗鍼處被寒核起而赤者必發責豚氣從小腹上撞心者灸其核上一壯與桂枝加桂湯

太陽病項背強几几反汗出惡風屬桂枝加葛根湯

太陽病項背強几几無汗惡風屬葛根湯

太陽與陽明合病而自利不嘔者屬葛根湯證

太陽與陽明合病不下利但嘔屬葛根加半夏湯

太陽病桂枝證醫反下之遂利不止其脈促者表未解喘而汗出屬葛根黃芩黃連湯

太陽病頭痛發熱身體疼腰痛骨節疼痛惡風無汗而喘屬麻黃湯證

太陽與陽明合病喘而胸滿不可下也屬麻黃湯證

太陽中風脈浮緊發熱惡寒身體疼痛不汗出而煩躁頭痛屬大青龍湯脈微弱汗出惡風不可服之服之則厥筋惕肉瞤此爲逆也

傷寒脈浮緩其身不疼但重乍有輕時無少陰證者大青龍湯發之

傷寒表不解心下有水氣乾嘔發熱而咳或渴或利或噎或小便不利小腹滿或微喘屬小青龍湯

傷寒心下有水氣欬而微喘發熱不渴服湯已而渴者此寒去爲欲解屬小青龍湯證

陽明中風脈弦浮大而短氣腹都滿脇下及心痛久按之氣

不通一作按之不痛鼻乾不得汗嗜臥一身及目悉黃小便難有潮

熱時時噦耳前後腫刺之小差外不解病過十日脈續浮與小柴胡湯但浮無餘證與麻黃湯不溺腹滿加噦不治

太陽病十日以去脈浮細嗜臥此爲外解設胸滿脇痛與小柴胡湯脈浮者屬麻黃湯證

中風往來寒熱傷寒五六日以後胃脇苦滿嘿嘿不欲飲食

煩心喜嘔或胃中煩而不嘔或渴或腹中痛或脇下痞堅或  
心中悸小便不利或不渴外有微熱或欬者屬小柴胡湯  
傷寒四五日身體熱惡風頸項強脇下滿手足溫而渴屬小  
柴胡湯證

傷寒六七日發熱微惡寒支節煩疼微嘔心下支結外證未  
去者屬柴胡桂枝湯

少陰病得之二三日麻黃附子甘草湯微發汗以二三日無  
裏證○按裏字原脫今依傷寒論補故微發汗也

脈浮小便不利微熱消渴與五苓散利小便發汗

### 病發汗以後證第三

二陽併病太陽初得病時發其汗汗先出復不徹因轉屬陽

明續自微汗出不惡寒若太陽證不罷不可下下之爲逆如此者可小發其汗設面色緣緣正赤者陽氣怫鬱在表當解之熏之若發汗不大微不足言陽氣怫鬱不得越當汗而不汗其人躁煩不知痛處乍在腹中乍在四肢按之不可得其人短氣但坐汗出而不微故也更發其汗卽愈何以知其汗不微脈澀故以知之

未持脈時病人叉手自冒心師因教試令欬而不卽欬者此必兩耳無所聞也所以然者重發其汗虛故也

發汗後飲水多者必喘以水灌之亦喘

發汗後水藥不得入口爲逆若更發其汗必吐下不止

陽明病本自汗出醫復重發其汗病已差其人微煩不了了

此大便堅也以亡津液胃中乾燥故令其堅當問小便日幾行若本日三四行今日再行者必知大便不久出今爲小便數少津液當還入胃中故知必當大便也

發汗多又復發其汗此爲亡陽若譖語脉短者死脈自和者不死

傷寒發其汗身目爲黃所以然者寒濕相搏在裏不解故也病人有寒復發其汗胃中冷必吐衄

太陽病發其汗遂漏而不止其人惡風小便難四肢微急難以屈伸屬桂枝加附子湯

服桂枝湯大汗出若脈但洪大與桂枝湯若其形如瘡一日再三發汗出便解屬桂枝二麻黃一湯

服桂枝湯大汗出大煩渴不解若脈洪大屬白虎湯

傷寒脈浮自汗出小便數頗復

仲景頗復字作心煩

微惡寒而腳攣急

反與桂枝湯欲攻其表得之便厥咽乾煩躁吐逆當作甘草乾薑湯以復其陽厥愈足溫更作芍藥甘草湯與之其腳卽伸而胃氣不和譫語可與承氣湯重發其汗復加燒針者屬四逆湯

傷寒發汗已解半日許復煩其脈浮數可復發其汗屬桂枝湯

發汗後身體疼痛其脈沈遲屬桂枝加芍藥生薑人參湯

發汗後不可更行桂枝湯汗出而喘無大熱可以麻黃杏子

甘草石膏湯



發汗過多以後其人叉手自冒心心下悸而欲得按之屬桂枝甘草湯

發汗後其人臍下悸欲作賁豚屬茯苓桂枝甘草大棗湯

發汗後腹脹滿屬厚朴生薑半夏甘草人參湯

發其汗不解而反惡寒者虛故也屬芍藥甘草附子湯不惡寒但熱者實也當和其胃氣宜小承氣湯

太陽病發汗若大汗出胃中燥煩不得眠其人欲飲水當稍飲之令胃中和則愈

發汗已脈浮而數復煩渴者屬五苓散

傷寒汗出而渴屬五苓散證不渴屬茯苓甘草湯

太陽病發其汗汗出不解其人發熱心下悸頭眩身瞤而動

振振欲擗地屬元武湯

傷寒汗出解之後胃中不和心下痞堅乾噫食臭脇下有水氣腹中雷鳴而利屬生薑瀉心湯

傷寒發熱汗出不解後心中痞堅嘔而下利屬大柴胡湯

太陽病三日發其汗不解蒸蒸發熱者屬於胃也屬承氣湯  
大汗出熱不去內拘急四肢疼下利厥逆而惡寒屬四逆湯  
發汗多亡陽譫語者不可下與柴胡桂枝湯和其榮衛以通  
津液後自愈

病不可吐證第四

太陽病當惡寒而發熱今自汗出反不惡寒發熱關上脈細而數此醫吐之過也若得病一日二日吐之腹中飢口不能

食三日四日吐之不喜糜粥欲食冷食朝食暮吐此醫吐之所致也此爲小逆

太陽病吐之者但太陽當惡寒今反不惡寒不欲近衣此爲吐之內煩也

少陰病飲食入則吐心中溫溫欲吐復不能吐始得之手足寒脈弦遲此胃中實不可下若膈上有寒飲乾嘔者不可吐當溫之

諸四逆厥者不可吐之虛家亦然

病可吐證第五

大法春宜吐

凡服湯吐中病便止不必盡劑也

病如桂枝證其頭不痛項不强寸口脈微浮胸中痞堅氣上撞咽喉不得息此爲胸有寒當吐之

病胸上諸實胃中鬱鬱而痛不能食欲使人按之而反有濁唾下利日十餘行其脈反遲寸口微滑此可吐之吐之利卽止

少陰病飲食入則吐心中溫溫欲吐復不能吐當遂吐之宿食在上管當吐之

病者手足厥冷脈乍緊邪結在胸中心下滿而煩飢不能食病在胸中當吐之

### 病不可下證第六

脈濡而弱弱反在關濡反在顛微反在上澀反在下微則陽

氣不足澀則無血陽氣反微中風汗出而反躁煩澀則無血厥而且寒陽微不可下下之則心下痞堅

動氣在右不可下下之則津液內竭咽燥鼻乾頭眩心悸動氣在左不可下下之則腹裏拘急食不下動氣反劇身雖有熱臥反欲蹠

動氣在上不可下下之則掌握熱煩身浮熱冷汗自泄

○按吳本

熱冷二字互易與傷寒論合 欲水自灌

動氣在下不可下下之則腹滿卒起頭眩食則下清穀心下痞堅

咽中閉塞不可下下之則上輕下重水漿不下臥則欲蹠身體急痛復下利日十數行

諸外實不可下下之則發微熱亡脈則厥當臍握熱

諸虛不可下下之則渴引水者易愈惡水者劇

脈濡而弱弱反在關濡反在顛弦反在上微反在下弦爲陽  
運微爲陰寒上實下虛意欲得溫微弦爲虛虛者不可下微  
則爲欬欬則吐涎沫下之欬則止而利不休胃中如蟲齧粥  
入則出小便不利兩脇拘急喘息爲難頸背相牽臂則不仁  
極寒反汗出軀冷若冰眼睛不慧語言不休穀氣多入則爲  
除中口雖欲言舌不得前

脈濡而弱弱反在關濡反在顛浮反在上數反在下浮爲陽  
虛數爲無血浮則爲虛數則生熱浮則爲虛自汗而惡寒數  
則爲痛振而寒慄微弱在關胃下爲急喘滿汗流

○案吳本  
無滿字流

字與傷寒論合

不得呼吸呼吸之中痛在於脇振寒相搏其形如瘧

醫反下之令脈急數發熱狂走見鬼恍惚

○按吳本無此二字與傷寒論合

心下爲痞小便淋瀝少腹甚堅小便血出

脈濡而緊濡則陽氣微緊則榮中寒陽微衛中風發熱而惡寒榮緊胃氣冷微嘔心內煩醫以爲大熱解肌而發汗亡陽虛煩燥心下苦痞堅表裏俱虛竭卒起而頭眩客熱在皮膚悵快不得眠不知胃氣冷緊寒在關元技巧無所施汲水灌其身客熱應時罷慄慄而振寒重被而覆之汗出而冒顛體惕而又振小便爲微難寒氣因水發清穀不容間嘔變反腸出顛倒不得安手足爲微逆身冷而內煩遲欲從後救安可復追還

脈浮而大浮爲氣實大爲血虛血虛爲無陰孤陽獨下陰部  
小便難胞中虛今反小便利而大汗出法衛家當微今反更  
實津液四射榮竭血盡虛煩不眠○按吳本虛作干傷寒論云乾煩而不得眠血  
薄肉消而成暴液醫復以毒藥攻其胃此爲重虛客陽去有  
期必下如汚泥而死

趺陽脈遲而緩胃氣如經也趺陽脈浮而數浮則傷胃數則  
動脾此非本病醫特下之所爲也榮衛內陷其數先微脈反  
但浮其人必大便堅氣噫而除何以言之脾脈本緩今數脈  
動脾其數先微故知脾氣不治大便堅氣噫而除今脈反浮  
其數改微邪氣獨留心中則飢邪熱不殺穀潮熱發渴數脈  
當遲緩脈因前後度數如前仲景前字作法病者則飢數脈不時則



生惡瘡

脈數者久數不止止則邪結正氣不能復正氣却結於藏故邪氣浮之與皮毛相得脈數者不可下下之必煩利不止少陰病脈微不可發其汗無陽故也陽已虛尺中弱澀者復不可下之

脈浮大應發其汗醫反下之此爲大逆

脈浮而大心下反堅有熱屬藏者攻之不令發汗屬腑者不令洩數洩數則大便堅汗多則熱愈汗少則便難脈遲尙未可攻

二陽併病太陽初得病時發其汗汗先出復不徹因轉屬陽明欲自汗出不惡寒若太陽證不罷不可下下之爲逆

結胸證其脈浮大不可下下之卽死

太陽與陽明合病喘而胸滿不可下之

太陽與少陽併病心下痞堅頸項強而眩勿下之

諸四逆厥者不可下之虛家亦然

病欲吐者不可下之

太陽病有外證未解不可下下之爲逆

病發於陽而反下之熱入因作結胸發於陰而反下之因作

痞

脈浮緊而下之

○按原本句首衍痞字緊誤作堅並依傷寒論刪正

緊反入裏因作痞

夫病陽多者熱下之則堅本虛攻其熱必噦無陽陰強而堅

下之必清穀而腹滿

太陰之爲病腹滿而吐食不下下之益甚腹時自痛胸下結堅

厥陰之爲病消渴氣上撞心中疼熱飢而不欲食甚者則欲吐下之不肯止

少陰病其人飲食人則吐心中溫溫欲吐復不能吐始得之手足寒脈弦遲此胸中實不可下也

傷寒五六日不結胸腹濡脈虛復厥者不可下下之亡血死傷寒發熱但頭痛微汗出發其汗則不識人熏之則喘不得小便心腹滿下之則短氣而腹滿小便難頭痛背強加溫針則必衄

傷寒其脈陰陽俱緊惡寒發熱則脈欲厥厥者脈初來大漸

漸小更來漸大是其候也惡寒甚者翕翕汗出喉中痛熱多者目赤睛不慧醫復發之咽中則傷若復下之則兩目閉寒多清穀熱多便膿血熏之則發黃熨之則咽燥小便利者可救難者必危殆

傷寒發熱口中勃勃氣出頭痛目黃衄不可制貪水者必嘔

惡水者厥下之咽中生瘡假令手足溫者下之

○按吳本無此二字與傷

寒論合

下重便膿血頭痛目黃者下之目閉貪水者下之其脈

必厥其聲嚶咽喉塞發其汗則戰慄陰陽俱虛惡水者下之

裏冷不嗜食大便完穀出發其汗口中傷舌上胎滑煩躁脈

數實不大便六七日後必便血復發其汗小便即自利

得病二三日脈弱無太陽柴胡症而煩躁心下堅至四日雖

能食以承氣湯少與微和之令小安至六日與承氣湯一升不大便六七日小便少者雖不大便但頭堅後溏未定成其堅攻之必溏當須小便利定堅乃可攻之

藏結無陽症寒而不熱

傷寒論云不往來寒熱

其人反靜舌上胎滑者

不可攻也

傷寒嘔多雖有陽明症不可攻之

陽明病潮熱微堅者可與承氣湯不堅不可與若不大便六七日恐有燥屎欲知之法可少與小承氣湯腹中轉失氣者此爲有燥屎乃可攻之若不轉失氣者此但頭堅後溏不可攻之攻之必腹滿不能食欲飲水者卽噦其後發熱者必復堅以小承氣湯和之若不轉失氣者慎不可攻之

陽明病身合色赤者不可攻也必發熱色黃者小便不利也  
陽明病當心下堅滿不可攻之攻之遂利不止者死止者愈  
陽明病自汗出若發其汗小便自利此爲內竭雖堅不可攻  
之當須自欲大便宜蜜煎導而通之若土瓜根及豬膽汁皆  
可以導

下利其脈浮大此爲虛以強下之故也設脈浮革因爾腸鳴  
屬當歸四逆湯

病可下證第七

大法秋宜下

凡可下者以湯勝丸散中病便止不必盡三服

陽明病發熱汗多者急下之屬大柴胡湯

少陰病得之二三日口燥咽乾者急下之屬承氣湯

少陰病六七日腹滿不大便者急下之屬承氣湯證

少陰病下利清水色青者心下必痛口乾燥者可下之屬大

柴胡湯承氣湯證

下利三部脈皆平按其心下堅者可下之屬承氣湯證

陽明與少陽合病而利脈不負者爲順負者失也互相刻賊

爲負滑而數者有宿食當下之屬大柴胡承氣湯證

傷寒後脈沉沉爲內實

玉函云脈沉實  
沉實者下之

下之解屬大柴胡湯

證

傷寒六七日目中不了了睛不和無表裏證大便難微熱者

此爲實急下之屬大柴胡湯承氣湯症

太陽病未解其脈陰陽俱停必先振汗出解但陽微者先汗之而解但陰微者先下之而解屬大柴胡湯證陰微一作尺實脈雙弦遲心下堅脈大而緊者陽中有陰可下之屬承氣湯證

結胃者項亦強如柔瘕狀下之卽和

病者無表裏證發熱七八日雖脈浮數可下之屬大柴胡湯證

太陽病六七日表證續在其脈微沉反不結胸其人發狂此熱在下焦少腹當堅而滿小便自利者下血乃愈所以然者以太陽隨經瘀熱在裏故也屬抵當湯

太陽病身黃其脈沉結少腹堅小便不利爲無血小便自利



其人如狂者血證諦屬抵當湯證

傷寒有熱而少腹滿應小便不利而反利者此爲血當下之屬抵當丸證

陽明病發熱而汗出此爲熱越不能發黃但頭汗出其身無有齊頸而還小便不利渴飲水漿此爲瘀熱在裏身必發黃屬茵陳蒿湯

陽明證其人喜忘必有畜血所以然者本有久瘀血故令喜忘雖堅大便秘黑屬抵當湯證

汗出而譫語者有燥屎在胃中此風也過經乃可下之下之若早語言亂以表虛裏實故也下之則愈屬大柴胡湯承氣湯證

病者煩熱汗出卽解復如瘧狀日晡所發者屬陽明脈實者當下之屬大柴胡湯承氣湯證

陽明病譫語有潮熱而反不能食者必有燥屎五六枚若能食者但堅耳屬承氣湯證

太陽中風下利嘔逆表解乃可攻之其人漉漉汗出發作有時頭痛心下痞堅滿引脇下痛嘔則短氣汗出不惡寒此爲表解裏未和屬十棗湯證

太陽病不解熱結膀胱其人如狂血自下下之卽愈其外未解尙未可攻當先解其外外解小腹急結者乃可攻之屬桃人承氣湯

傷寒七八日身黃如橘小便不利少腹微滿屬茵陳蒿湯證

傷寒十餘日熱結在裏復往來寒熱屬大柴胡湯證

但結胸無大熱此爲水結在胸脇頭微汗出與大陷胸湯

傷寒六七日結胸熱實其脈沉緊心下痛按之如石堅與大陷胸湯

陽明病其人汗多津液外出胃中燥大便必堅堅者必譫語屬承氣湯證

陽明病不吐下而心煩者可與承氣湯

陽明病其脈遲雖汗出而不惡寒其體必重短氣腹滿而喘

有潮熱如此者其外爲解可攻其裏若手足濇然汗出者此

大便已堅屬承氣湯其熱不潮未可與承氣湯若腹滿大而

不大便者屬小承氣湯微和胃氣勿令至大下

陽明病譫語發潮熱其脈滑疾如此者屬承氣湯因與承氣湯一升腹中轉失氣者復與一升如不轉失氣者勿更與之明日又不大便脈反微澀者此爲裏虛爲難治不可更與承氣湯

二陽併病太陽證罷但發潮熱手足絳絳汗出大便難而譫語者下之愈屬承氣湯證

病人小便不利大便乍難乍易時有微熱喘冒不能臥者有燥屎也屬承氣湯證

病發汗吐下以後證第八

師曰病人脈微而澀者此爲醫所病也大發其汗又數大下之其人亡血病當惡寒而發熱無休止時夏月盛熱而欲著

月系卷一  
三  
複衣冬月盛寒而欲裸其體所以然者陽微卽惡寒陰弱卽發熱醫發其汗使陽氣微又大下之令陰氣弱五月之時陽氣在表胃中虛冷以陽氣內微不能勝冷故欲著複衣十一月之時陽氣在裏胃中煩熱以陰氣內弱不能勝熱故欲裸其體又陰脈遲澀故知亡血

太陽病三日已發其汗吐下溫鍼而不解此爲壞病桂枝復不中與也觀其脈證知犯何逆隨證而治之

脈浮數法當汗出而愈而下之則身體重心悸不可發其汗當自汗出而解所以然者尺中脈微此裏虛須表裏實津液和卽自汗出愈

凡病若發汗若吐若下若亡血無津液而陰陽自和者必自

愈

愈

天下後發汗其人小便不利此亡津液勿治其小便利必自  
下以後復發其汗必振寒又其脈微細所以然者內外俱虛  
故也

太陽病先下而不愈因復發其汗表裏俱虛其人因冒冒家  
當汗出自愈所以然者汗出表和故也表和然後下之

得病六七日脈遲浮弱惡風寒手足溫醫再三下之不能多

多一作食其人脇下滿面目及身黃頸項強小便難與柴胡湯後

必下重本渴飲水而嘔柴胡湯不復中與也食穀者噦

太陽病二三日終不能臥但欲起者心下必結其脈微弱者

此本寒也而反下之利止者必結胸未止者四五日復重下之此挾熱利也

太陽病下之其脈促不結胸者此爲欲解其脈浮者必結胸其脈緊者必咽痛其脈弦者必兩脇拘急其脈細而數者頭痛未止其脈沈而緊者必欲嘔其脈沈而滑者挾熱利其脈浮而滑者必下血

太陽少陽併病而反下之成結胸心下堅下利不復止水漿不肯下其人必心煩

脈浮緊而下之緊反入裏則作痞按之自濡但氣痞耳

傷寒吐下發汗虛煩脈甚微八九日心下痞堅脇下痛氣上衝咽喉眩冒經脈動惕者久而成痿

陽明病不能食下之不解其人不能食攻其熱必噦所以然者胃中虛冷故也

陽明病脈遲食難用飽飽卽發煩頭眩者必小便難此欲作穀疸雖下之其腹滿如故耳所以然者脈遲故也

太陽病寸緩關浮尺弱其人發熱而汗出復惡寒不嘔但心下痞者此爲醫下之也

傷寒大吐大下之極虛復極汗者其人外氣怫鬱復與之水以發其汗因得噦所以然者胃中寒冷故也

吐下發汗後其人脈平而小煩者以新虛不勝穀氣故也

太陽病醫發其汗遂發熱而惡寒復下之則心下痞此表裏俱虛陰陽氣併竭無陽則陰獨復加火鍼因而煩面色青黃



膚暍如此者爲難治今色微黃手足溫者易愈

服桂枝湯下之頭項強痛翕翕發熱無汗心下滿微痛小便不利屬桂枝去桂加茯苓朮湯

太陽病先發其汗不解而下之其脈浮者不愈浮爲在外而反下之故令不愈今脈浮故在外當解其外則愈屬桂枝湯下以後復發其汗者則晝日煩躁不眠夜而安靜不嘔不渴而無表證其脈沉微身無大熱屬乾薑附子湯

傷寒吐下發汗後心下逆滿氣上撞胸起卽頭眩其脈沉緊發汗卽動經身爲振搖屬茯苓桂枝朮甘草湯

發汗吐下以後不解煩躁屬茯苓四逆湯

傷寒發汗吐下後虛煩不得眠劇者反復顛倒心中懊憹屬

梔子湯若少氣梔子甘草湯若嘔梔子生薑湯若腹滿梔子厚朴湯

發汗若下之煩熱胸中塞者屬梔子湯證

太陽病過經十餘日心下溫溫欲吐而胸中痛大便反溏其腹微滿鬱鬱微煩先時自極吐下者與承氣湯不爾者不可與欲嘔胸中痛微溏此非柴胡湯證以嘔故知極吐下也

太陽病重發其汗而復下之不大便五六日舌上燥而渴日晡所小有潮熱從心下至少腹堅滿而痛不可近屬大陷胃湯

傷寒五六日其人已發汗而復下之胸脇滿微結小便不利渴而不嘔但頭汗出往來寒熱心煩此爲未解屬柴胡桂枝

乾薑湯

傷寒汗出若吐下解後心下痞堅噫氣不除者屬旋覆代赭湯

大下以後不可更行桂枝湯汗出而喘無大熱可以麻黃杏子甘草石膏湯

傷寒大下後復發其汗心下痞惡寒者表未解也不可攻其痞當先解表表解乃攻其痞解表屬桂枝湯攻痞屬大黃黃連瀉心湯

傷寒吐下後七八日不解熱結在裏表裏俱熱時時惡風大渴舌上乾燥而煩欲飲水數升屬白虎湯

傷寒吐下後未解不大便五六日至十餘日其人日晡所發

潮熱不惡寒獨語如見鬼神之狀若劇者發則不識人循衣妄撮怵惕不安微喘直視脈絃者生澀者死微者但發熱譫語屬承氣湯若下者勿復服

三陽合病腹滿身重難以轉側口不仁面垢譫語遺溺發汗則譫語下之則額上生汗手足厥冷自汗屬白虎湯證

陽明病其脈浮緊咽乾口苦腹滿而喘發熱汗出而不惡寒反偏惡熱其身體重發其汗卽燥心憤憤而反譫語加溫針必怵惕又煩躁不得眠下之卽胃中空虛客氣動膈心中懊懣舌上胎者屬梔子湯證

陽明病下之其外有熱手足溫不結胸心中懊懣苦饑不能食但頭汗出屬梔子湯證

陽明病下之心中懊懣而煩胃中有燥屎者可攻其人腹微滿頭堅後溏者不可下之有燥屎者屬承氣湯證

太陽病吐下發汗後微煩小便數大便因堅可與小承氣湯和之則愈

大汗若大下而脈冷者屬四逆湯證

太陽病下之其脈促胸滿者屬桂枝去芍藥湯若微寒屬桂枝去芍藥加附子湯

傷寒五六日大下之身熱不去心中結痛者未欲解也屬梔子湯證

傷寒下後煩而腹滿臥起不安屬梔子厚朴湯

傷寒醫以丸藥大下之身熱不去微煩屬梔子乾薑湯

傷寒醫下之續得下利清穀不止身體疼痛急當救裏身體疼痛清便自調急當救表救裏宜四逆湯救表宜桂枝湯

太陽病過經十餘日反再三下之後四五日柴胡證續在先

與小柴胡湯嘔止小安

嘔止小安一云嘔不止心下急

其人鬱鬱微煩者爲

未解與大柴胡湯下之則愈

傷寒十三日不解胸脇滿而嘔日晡所發潮熱而欲利此本當柴胡湯下之不得利今反利者故知醫以丸藥下之非其治也潮熱者實也先再服小柴胡湯以解其外後屬柴胡加芒硝湯

傷寒十三日過經而譫語內有熱也當以湯下之小便利者大便當堅而反利其脈調和者知醫以丸藥下之非其治也

自利者其脈當微厥今反和者此爲內實屬承氣湯證

傷寒八九日下之胃滿煩驚小便不利譫語一身不可轉側屬柴胡加龍骨牡蠣湯

火逆下之因燒鍼煩躁屬桂枝甘草龍骨牡蠣湯

太陽病脈浮而動數浮則爲風數則爲熱動則爲痛數則爲虛頭痛發熱微盜汗出而反惡寒其表未解醫反下之動數則遲頭痛卽眩

一云膈內拒痛

胃中空虛客氣動膈短氣躁煩心中

懊懣陽氣內陷心下因堅則爲結胸屬大陷胸湯若不結胸但頭汗出其餘無有齊頸而還小便不利身必發黃屬柴胡

梔子湯

○按吳本無此句與傷寒論合

傷寒五六日嘔而發熱柴胡湯證具而以佗藥下之柴胡證

仍在復與柴胡湯此雖已下不爲逆也必蒸蒸而振却發熱汗出而解若心下滿而堅痛者此爲結胸屬大陷胸湯若但滿而不痛者此爲痞柴胡復不中與也屬半夏瀉心湯

本以下之故心下痞與之瀉心其痞不解其人渴而口燥小便不利者屬五苓散

一方言忍之一日乃愈

傷寒中風醫反下之其人下利日數十行穀不化腹中雷鳴心下痞堅而滿乾嘔而煩不能得安醫見心下痞爲病不盡復重下之其痞益甚此非結熱但胃中虛客氣上逆故使之堅屬甘草瀉心湯

傷寒服湯藥而下利不止心下痞堅服瀉心湯已後以佗藥下之利不止醫以理中與之利益甚理中理中瞧此利在下



三  
焦屬赤石脂禹餘糧湯若不止者當利其小便

太陽病外證未除而數下之遂挾熱而利不止心下痞堅表裏不解屬桂枝人參湯

傷寒吐後腹滿者與承氣湯

病者無表裏證發熱七八日脈雖浮數者可下之假令下已脈數不解今熱則消穀喜飢至六七日不大便者有瘀血屬抵當湯若脈數不解而不止必失血便膿血

太陽病醫反下之因腹滿時痛爲屬太陰屬桂枝加芍藥湯大實痛屬桂枝加大黃湯

傷寒六七日其人大下後脈沉遲手足厥逆下部脈不至咽嗑不利唾膿血泄利不止爲難治屬麻黃升麻湯

傷寒本自寒下醫復吐下之寒格更遂吐

一本作更逆吐下

食入卽

出屬乾薑黃芩黃連人參湯

病可溫證第九

大法冬宜服溫熱藥及灸

師曰病發熱頭痛脈反沉若不差身體更疼痛當救其裏宜溫藥四逆湯

下利腹滿身體疼痛先溫其裏宜四逆湯

自利不渴者屬太陰其藏有寒故也當溫之宜四逆輩

少陰病其人飲食入則吐心中溫溫欲吐復不能吐始得之手足寒脈弦遲若膈上有寒飲乾嘔者不可吐當溫之宜四逆湯

少陰病脈沉者急當溫之宜四逆湯

下利欲食者就當溫之

下利脈遲緊爲痛未欲止當溫之得冷者滿而便腸垢

下利其脈浮大此爲虛以強下之故也設脈浮革因爾腸鳴當溫之宜當歸四逆湯

少陰病下利脈微澁者卽嘔汗出必數更衣反少當溫之

傷寒醫下之續得下利清穀不止身體疼痛急當救裏宜溫之以四逆湯

病不可灸證第十

微數之脈慎不可灸因火爲邪則爲煩逆追虛逐實血散脈中火氣雖微內攻有力焦骨傷筋血難復也

脈浮當以汗解而反灸之邪無從去因火而盛病從腰以下必當重而痺此爲火逆若欲自解當先煩煩乃有汗隨汗而解何以知之脈浮故知汗出當解

脈浮熱甚而灸之此爲實實以虛治因火而動咽燥必吐血病可灸證第十一

燒鍼令其汗鍼處被寒核起而赤者必發責豚氣從少腹上撞者灸其核上一壯與桂枝加桂湯

少陰病得之一二日口中和其背惡寒者當灸之

少陰病其人吐利手足不逆反發熱不死脈不足者灸其少陰七壯

少陰病下利脈微澁者卽嘔汗出必數更衣反少當溫其上

灸之

一云灸厥陰  
可五七壯

諸下利皆可灸足大都五壯

一云七壯

商邱陰陵泉皆三壯

下利手足厥無脈灸之不溫反微喘者死少陰趺陽者爲順也

傷寒六七日其脈微手足厥煩躁灸其厥陰厥不還者死

傷寒脈促手足厥逆可灸之爲可灸少陰厥陰主四逆

### 病不可刺證第十二

大怒無刺

大一作新

已刺無怒

大一作新

新內無刺已刺無內大勞無

刺

大一作新

已刺無勞大醉無刺已刺無醉大飽無刺已刺無飽

大飢無刺已刺無飢大渴無刺已刺無渴無刺大驚無刺

熇之熱無刺漉漉之汗無刺渾渾之脈身熱甚陰陽皆爭者

勿刺也其可刺者急取之不汗則洩所謂勿刺者有死徵也  
無刺病與脈相逆者上工刺未生其次刺未盛其次刺已衰  
粗工逆此謂之伐形

出九卷

病可刺證第十三

太陽病頭痛至七日自當愈其經竟故也若欲作再經者當  
鍼足陽明使經不傳則愈

太陽病初服桂枝湯而反煩不解者當先刺風池風府乃却  
與桂枝湯則愈

傷寒腹滿而譫語寸口脈浮而緊者此爲肝乘脾名縱當刺  
期門

傷寒發熱嗇嗇惡寒其人大渴欲飲酢漿者其腹必滿而自

汗出小便利其病欲解此爲肝乘肺名曰橫當刺期門

陽明病下血而譫語此爲熱入血室但頭汗出者當刺期門  
隨其實而瀉之濺然汗出者則愈

婦人中風發熱惡寒經水適來得之七八日熱除脈遲身涼

胸脇下滿如結胸狀其人譫語此爲熱入血室當刺期門隨

其虛實而取之

平病云熱入血室無犯胃氣及上  
二膽與此相反豈謂藥不謂針耶

太陽與少陽併病頭痛頸項強而眩時如結胸心下痞堅當  
刺大杼第一間肺輸肝輸慎不可發汗發汗則譫語譫語則  
脈弦譫語五日不止當刺期門

少陰病下利便膿血者可刺

婦人傷寒懷身腹滿不得小便加從腰以下重如有水氣狀

懷身七月太陰當養不養此心氣實當刺寫勞宮及關元小便利則愈

傷寒喉痺刺手少陰少陰在腕當小指後動脈是也針入三分補之

問曰病有汗出而身熱煩滿煩滿不爲汗解者何對曰汗出而身熱者風也汗出而煩滿不解者厥也病名曰風厥也太陽主氣故先受邪少陰與爲表裏也得熱則上從之從之則厥治之表裏刺之飲之湯

熱病三日氣口靜人迎躁者取之諸陽五十九刺以瀉其熱而出其汗實其陰以補其不足所謂五十九刺者兩手外內側各三凡十二瘡五指間各一凡八瘡足亦如是頭入髮一



寸傍三分各三凡六疔更入髮三寸邊各五凡十疔耳前後口下項中各一凡六疔顛上一顚會一髮際一廉泉一風池

二天柱二

○按顚會以下原本並脫去今依靈樞二十二補正

熱病先膚痛窒鼻充面取之皮以第一鍼五十九苛菌爲軫

一云苛軫

鼻索皮於肺不得索之火火心也

熱病噦乾多飲善驚臥不能安取之膚肉以第六針五十九目眚赤索肉於脾不得索之木木肝也

熱病而胸脇痛手足躁取之筋間以第四針針於四達

一作逆

筋辟目浸索筋於肝不得索之金金肺也

熱病數驚瘈瘲而強取之脈以第四針急瀉有餘者癰疾毛

髮去索血

一作脈

於心不得索之水水腎也

熱病身重骨痛耳聾而好瞑取之骨以第四針五十九骨病

食齧牙齒耳清

○按甲乙經云骨病不食齧齒耳青赤靈樞無赤字餘並同疑此文誤

索骨於

腎不得索之土土脾也

熱病先身濇傍敦

傍敦大素作倚

煩悶乾屑啞取之以第一鍼五十

九膚脹口乾寒汗

熱病頭痛攝

攝一作顛顛

目脈緊善衄厥熱也取之以第三針視

有餘不足寒熱病

熱病體重腸中熱取之以第四針於其輸及下諸指間索氣

於胃絡得氣也

熱病俠臍痛急胸脇支滿取之涌泉與太陰陽明

一云陰陵泉

以

第四針針啞裏

熱病而汗且出及脈順可汗者

○按原本及誤反依甲乙經改

取之魚際大

淵大都大白瀉之則熱去補之則汗出汗出太甚者取踝上

橫文以止之

○按甲乙經文作脈

熱病七日八日脈口動喘而眩者急刺之汗且自出淺刺手

大指間

熱病先胸脇痛手足躁刺足少陽補手太陰病甚爲五十九

刺

熱病先手臂痛刺手陽明太陰而汗出止

熱病始於頭首者刺項太陽而汗出止

熱病先身重骨痛耳聾目瞑刺足少陰病甚爲五十九刺

云一

陽刺少

熱病先眩冒而熱胸脇滿刺足少陰少陽

熱病始足脛者先取足陽明而汗出

病不可水證第十四

發汗後飲水多者必喘以水灌之亦喘

傷寒大吐大下之極虛復極汗者其人外氣怫鬱復與之水以發其汗因得噦所以然者胃中寒冷故也

陽明病潮熱微堅可與承氣湯不堅勿與之若不大便六七日恐有燥屎欲知之法可與小承氣湯若腹中不轉失氣者此爲但頭堅後溏不可攻之攻之必腹滿不能食飲水者卽噦

陽明病若胃中虛冷其人不能食飲水卽噦

下利其脈浮大此爲虛以強下之故也設脈浮革因爾腸鳴  
當溫之與水卽噦

病在陽當以汗解而反以水噀之若灌之其熱却不得去益  
煩皮上粟起意欲飲水反不渴宜文蛤散若不差與五苓散  
若寒實結胸無熱證者與三物小陷胷湯白散亦可身熱皮  
粟不解欲引衣自覆若以水噀之洗之益令熱却不得出當  
汗而不汗卽煩假令汗出已腹中痛與芍藥三兩如上法  
寸口脈浮大醫反下之此爲大逆浮卽無血大卽爲寒寒氣  
相搏卽爲腸鳴醫乃不知而反飲水令汗大出水得寒氣冷  
必相搏其人卽餒

寸口脈濡而弱濡卽惡寒弱卽發熱濡弱相搏藏氣衰微胸

中苦煩此非結熱而反薄居水漬布冷銚貼之陽氣遂微諸府無所依陰脈凝聚結在心下而不肯移胃中虛冷水穀不化小便縱通復不能多微則可救聚寒心下當柰何也

病可水證第十五

太陽病發汗後若大汗出胃中乾燥煩不得眠其人欲飲水當稍飲之令胃中和則愈

厥陰病渴欲飲水者與水飲之即愈

太陽病寸口緩關上小浮尺中弱其人發熱而汗出復惡寒而不嘔但心下痞者此爲醫下之也若不下其人復不惡寒而渴者爲轉屬陽明小便數者大便即堅不更衣十日無所苦也欲飲水者但與之當以法救渴宜五苓散

寸口脈洪而大數而滑洪大則榮氣長滑數則胃氣實榮長則陽盛怫鬱不得出身胃實則堅難大便則乾燥三焦閉塞津液不通醫發其汗陽盛不周復重下之胃燥熱畜大便遂擯小便不利榮衛相搏心煩發熱兩眼如火鼻乾面赤舌燥齒黃焦故大渴過經成壞病針藥所不能制與水灌枯槁陽氣微散身寒溫衣覆汗出表裏通然其病卽除形脈多不同此愈非法治但醫所當慎妄犯傷榮衛

霍亂而頭痛發熱身體疼痛熱多欲飲水屬五苓散

嘔吐而病在膈上後必思水者急與猪苓散飲之水亦得也  
病不可火證第十六

太陽中風以火劫發其汗邪風被火熱血氣流決失其常度

兩陽相熏灼其身發黃陽盛則欲衄陰虛小便難陰陽俱虛  
竭身體則枯燥但頭汗出齊頸而還腹滿而微喘口乾咽爛  
或不大便久則譫語甚者至噦

○按原本此二字誤作多蔡今依傷寒論改

手足

躁擾循衣摸牀小便利者其人可治

太陽病醫發其汗遂發熱而惡寒復下之則心下痞此表裏  
俱虛陰陽氣併竭無陽則陰獨復加火針因而煩面色青黃  
膚潤如此者爲難治今色微黃手足溫者愈

傷寒加溫鍼必驚

陽脈浮陰脈弱則血虛血虛則筋惕其脈沉者榮氣微也其  
脈浮而汗出如流珠者衛氣衰也榮氣微加燒針血留不行  
更發熱而躁煩也



傷寒脈浮而醫以火迫劫之亡陽驚狂起卧不安屬桂枝去芍藥加蜀漆牡蠣龍骨救逆湯

問曰得病十五十六日身體黃下利狂欲走師脈之言當下清血如豚肝乃愈後如師言何以知之師曰寸口脈陽浮陰濡弱陽浮則爲風陰濡弱爲少血浮虛受風少血發熱惡寒洒淅項強頭眩醫加火熏鬱令汗出惡寒遂甚客熱因火而發怫鬱蒸肌膚身曰爲黃小便微難短氣從鼻出血而復下之胃無津液泄利遂不止熱瘀在膀胱畜結成積聚狀如豚肝當下未下心亂迷憤狂走赴水不能自制畜血若去目明心了此皆醫所爲無他禍患微輕得愈極者不治

傷寒其脈不弦緊而弱者必渴被火必譫言弱者發熱脈浮

解之當汗出愈

太陽病以火熏之不得汗其人必躁到經不解必有清血

陽明病被火額上微汗出而小便不利必發黃

陽明病其脈浮緊咽乾口苦腹滿而喘發熱汗出而不惡寒反偏惡熱其身體重發其汗則躁心憤憤而反譫語加溫針必怵惕又煩躁不得眠

少陰病欬而下利譫語是爲被火氣劫故也小便必難爲強責少陰汗也

太陽病二日而燒瓦熨其背大汗出火氣入胃胃中竭燥必發譫語十餘日振而反汗出者此爲欲解其汗從腰以下不得汗其人欲小便反不得嘔欲失溲足下惡風大便堅者小

月系卷一  
三三  
便當數而反不數及多便已其頭卓然而痛其人足心必熱  
穀氣下流故也

病可火證第十七

下利穀道中痛當溫之以火宜熬末鹽熨之一方灸枳實熨  
之

熱病陰陽交并少陰厥逆陰陽竭盡生死症第十八

問曰溫病汗出輒復熱而脈躁疾不爲汗衰狂言不能食病  
名爲何對曰名曰陰陽交交者死人所以汗出者生於穀穀  
生於精今邪氣交爭於骨肉而得汗者是邪却而精勝精勝  
則當能食而不復熱熱者邪氣也汗者精氣也今汗出而輒  
復熱者邪勝也不能食者精無裨也汗出而熱留者壽可立

而傾也夫汗出而脈尙躁盛者死今脈不與汗相應此不勝其病也狂言者是失志失志者死此有三死不見一生雖愈必死

熱病已得汗而脈尙躁盛此陰脈之極也

○按原本陰誤作陽依甲乙經改

死其得汗而脈靜者生也

熱病脈尙躁盛而不得汗者此陽脈之極也死脈躁盛得汗者生也

熱病已得汗而脈尙躁喘且復熱勿膚刺喘甚者死

熱病陰陽交者死

熱病煩已而汗脈當靜

太陽病脈反躁盛者是陰陽交死復得汗脈靜者生

熱病陰陽交者熱煩身躁太陰寸口脈兩衝尙躁盛是陰陽交死得汗脈靜者生

熱病陽進陰退頭獨汗出死陰進陽退腰以下至足汗出亦死陰陽俱進汗出已熱如故亦死陰陽俱退汗出已寒慄不止鼻口氣冷亦死

以上熱病陰陽交部

熱病所謂并陰者熱病已得汗因得泄是謂并陰故治

一作活

熱病所謂并陽者熱病已得汗脈尙躁盛大熱汗出雖不汗

出若衄是謂并陽故治

以上熱病并陰陽部

少陰病惡寒踈而利手足逆者不治

少陰病下利止而眩時時自冒者死

少陰病其人吐利躁逆者死

少陰病四逆惡寒而踰其脈不至其人不煩而躁者死

少陰病六七日其人息高者死

少陰病脈微細沉但欲臥汗出不煩自欲吐五六日自利復煩躁不得臥寐者死

少陰病下利若利止惡寒而踰手足溫者可治

少陰病惡寒而踰時時自煩欲去其衣被者可治

少陰病下利不止厥逆無脈乾嘔煩服湯藥其脈暴出者死

微細者生

以上少陰部

傷寒六七日其脈微手足厥煩躁灸其厥陰厥不還者死

傷寒下利厥逆躁不能臥者死

傷寒發熱下利至厥不止者死

傷寒厥逆六七日不利便發熱而利者生其人汗出利不止

者死

○按傷寒論云便發熱而利其人汗出不止者死

但有陰無陽故也

傷寒五六日不結胸腹濡脈虛復厥者不可下下之亡血死

傷寒發熱而厥七下利者爲難治

以上厥逆部

熱病不知所痛不能自收口乾陽熱甚陰頗有寒者熱在髓

死不治

熱病在腎令人渴口乾舌焦黃赤晝夜欲飲不止腹大而脹

尙不厭飲目無精光死不治

脾傷卽中風陰陽氣別離陰不從陽故以三分候其死生

按○

此條已見前卷第五篇中而文小異姑依原本存之

傷寒欬逆上氣其脈散者死謂其人形損故也

傷寒下利日十餘行其人脈反實者死

病者脇下素有痞而下在臍傍痛引少腹入陰俠陰筋此爲藏結死

夫實則譫語虛則鄭聲鄭聲者重語是也直視譫語喘滿者死若下利者亦死

結胸證悉具而躁者死

吐舌下卷者死唾如膠者難解舌頭四邊徐有津液此爲欲解病者至經上脣有色脈自和爲欲解色急者未解

以上陰陽竭盡

部

重實重虛陰陽相附生死證第十九

問曰何謂虛實對曰邪氣盛則實精氣奪則虛重實者肉有



熱病氣熱脈滿是謂重實問曰經絡俱實何如對曰經絡皆實是寸脈急而尺脈緩也皆當俱治故曰滑則順濇則逆夫虛實者皆從其物類治五藏骨肉滑利可以長久寒氣暴上脈滿實實而滑順則生實而濇逆則死形盡滿脈急大堅尺滿而不應順則生逆則死所謂順者手足溫所謂逆者手足寒也

問曰何謂重虛對曰脈虛氣虛尺虛是謂重虛所謂氣虛者言無常也尺虛者行步趺然也脈虛者不象陰也如此者滑則生濇則死氣虛者肺虛也氣逆者足寒也非其時則生當其時則死餘藏皆如此也脈實滿手足寒頭熱者春秋則生冬夏則死脈浮而濇濇而身有熱者死絡氣不足經氣有餘

脈熱而尺寒秋冬爲逆春夏爲順經虛絡滿者尺熱滿而脈

寒瀼

○按脈字原脫依素問二十八補

春夏死秋冬生絡滿經虛灸陰刺陽

經滿絡虛刺陰灸陽

問曰秋冬無極陰春夏無極陽何謂也對曰無極陽者春夏

無數虛陽明陽明虛則狂無極陰者秋冬無數虛太陰太陰

虛則死

以上重實重虛部

熱病所謂陽附陰者腰以下至足熱腰以上寒陰氣下爭還

心腹滿者死所謂陰附陽者腰以上至頭熱腰以下寒陽氣

上爭還得汗者生

以上陰陽相附部

熱病生死期日證第二十

太陽之脈色榮顙骨熱病也榮未天曰今且得汗待時自已

與厥陰脈爭見者死期不過三日其熱病氣內連腎少陽之脈色榮頰前熱病也榮未天曰今且得汗待時自己與少陰脈爭見者死期不過三日

熱病七八日脈微小病者洩血口中乾一日半而死脈代者一日死

熱病七八日脈不躁喘不數後三日中有汗三日不汗四日死未曾汗勿膚刺

膚一作膚

熱病三四日脈不喘其動均者身雖煩熱今自得汗生傳曰始府入藏終陰復還陽故得汗

熱病七八日脈不喘其動均者生微熱在陽不入陰今自汗也

熱病七八日脈不喘動數均者病當瘡期三日不得汗四日死

熱病身面盡黃而腫心熱口乾舌卷焦黃黑身麻臭伏毒傷肺中脾者死

熱病瘕癰狂言不得汗瘕癰不已伏毒傷肝中膽者死

熱病汗不出出不至足嘔膽吐血善驚不得卧伏毒在肝腑足少陽者死

熱病十逆死證第二十一

熱病腹滿臍脹身熱者不得大小便脈濇小疾一逆見死  
熱病腸鳴腹滿四肢清泄注脈浮大而洪不已二逆見死  
熱病大衄不止腹中痛脈浮大絕喘而短氣三逆見死

熱病嘔且便血奪形肉身熱甚脈絕動疾四逆見死

熱病欬喘悸眩身熱脈小疾奪形肉五逆見死

熱病腹大而脹四肢清奪形肉短氣六逆見一旬內死

熱病腹脹便血脈大時時小絕汗出而喘口乾舌焦視不見人七逆見一旬死

熱病身熱甚脈轉小咳而便血目眵陷妄言手循衣縫口乾躁擾不得臥八逆見一時死

熱病痙癎狂走不能食腹滿胸痛引腰臍背嘔血九逆見一時死

熱病嘔血喘咳煩滿身黃其腹鼓脹泄不止脈絕十逆見一時死

熱病五藏氣絕死日證第二十二

熱病肺氣絕喘逆欬唾血手足腹腫面黃振慄不能言語死  
魄與皮毛俱去故肺先死丙日篤丁日死

熱病脾氣絕頭痛嘔宿汁不得食嘔逆吐血水漿不得入狂  
言譫語腹大滿四肢不收意不樂死脈與肉氣俱去故脾先  
死甲日篤乙日死

熱病心主氣絕煩滿骨痛

一作與

監腫不可咽欲欬不能欬歌

哭而笑死神與榮脈俱去故心先死壬日篤癸日死

熱病肝氣絕僵仆足不安地嘔血恐懼洒淅惡寒血妄出遺  
尿溺死魂與筋血俱去故肝先死庚日篤辛日死

熱病腎氣絕喘悸吐逆踵疽尻癰目視不明骨痛短氣喘滿

汗出如珠死精與骨髓俱去故腎先死戊日篤巳日死  
外見瞳子青小爪甲枯髮墮身澀齒挺而垢人皮面厚塵黑  
咳而唾血渴欲數飲大滿此五藏絕表病也

熱病至脈死日證第二十三

熱病脈四至三日死脈四至者平人一至病人脈四至也

熱病脈五至一日死時一大至半日死忽忽悶亂者死

熱病脈六至半日死忽急疾大至有頃死

熱病脈損日死證第二十四

熱病脈四損三日死所謂四損者平人四至病人脈一至名

曰四損

熱病脈五損一日死所謂五損者平人五至病人脈一至名

曰五損

熱病脈六損一時死所謂六損者平人六至病人脈一至名

曰六損若絕不至或久乃至立死

○此下吳本又有一條云治傷寒形證所宜進退晉

王叔和集仲景評脈要論按袁本無此條疑非脈經原文

脈經卷之七終





脈經卷之八

平卒中厥脈證第一

平瘧濕暍脈證第二

平陽毒陰毒百合狐惑脈證第三

平霍亂轉筋脈證第四

平中風歷節脈證第五

平血痺虛勞脈證第六

平消渴小便利淋脈證第七

平水氣黃汗氣分脈證第八

平黃疸寒熱瘧脈證第九

平胸痺心痛短氣賁豚脈證第十

平腹滿寒疝宿食脈證第十一

平五藏積聚脈證第十二

平驚悸衄吐下血胸滿瘀血脈證第十三

平嘔噦下痢脈證第十四

平肺痿肺癰欬逆上氣痰飲脈證第十五

平癰腫腸癰金瘡侵淫脈證第十六

平卒尸厥脈證第一

寸口沉大而滑沉則爲實滑則爲氣實氣相搏血氣入於藏

卽死

○按此文有脫誤千金方云沉卽爲血實滑卽爲氣實血氣相搏入藏卽死

入於腑卽愈此

爲卒厥不知人脣青身冷爲入藏卽死如身溫和汗自出爲

入腑而復自愈

平瘧濕暍脈證第二

瘧一作瘧

太陽病發熱無汗而反惡寒者名剛瘧

太陽病發熱汗出而不惡寒者名柔瘧

一云惡寒

太陽病發熱其脈沉而細者爲瘧

太陽病發其汗因致瘧

論云發其汗太多因致瘧

病者身熱足寒頸項強急惡寒時頭熱面赤目脈赤獨頭動

搖者爲瘧

論云獨頭面搖卒口噤背反張者瘧病也

太陽病無汗而小便反少氣上衝胃口噤不得語欲作剛瘧

葛根湯主之

剛瘧爲病胸滿口噤臥不着席脚攣急其人必齮齒可與大

承氣湯

瘧病發其汗已其脈沕沕如蛇暴腹脹大者爲欲解脈如故

反伏弦者必瘧

一云瘧脈出欲已

瘧脈來按之築築而弦直上下行

瘧家其脈伏堅直上下

夫風病下之則瘧復發其汗必拘急

太陽病其證備身體強凡凡然脈沉遲此爲瘧枯萑桂枝湯

主之

瘧病有灸瘡難療

瘡家雖身疼痛不可發其汗汗出則瘧

太陽病關節疼煩脈沉而緩者爲中濕

論云中濕爲濕痺濕痺之候其人小便不

利大便反快但當利其小便

病者一身盡疼

一云疼煩

發熱日晡卽劇此爲風濕汗出所致也

論云此病傷於汗出當風或久傷取冷所致

濕家之爲病一身盡疼發熱而身色似熏黃也

濕家之爲病其人但頭汗出而背強欲得被覆向火若下之

蚤則噦或胃滿小便利

一云不利

舌上如胎此爲丹田有熱胸上

有寒渴欲飲而不能飲則口燥也

濕家下之額上汗出微喘小便利

一云不利

者死若下利不止者

亦死

問曰風濕相搏身體疼痛法當汗出而解值天陰雨不止師

云此可發汗而其病不愈者何也荅曰發其汗汗大出者但

風氣去濕氣續在是故不愈若治風濕者發其汗微微似欲

出汗者則風濕俱去也

濕家身煩疼可與麻黃湯加朮四兩發其汗爲宜慎不可以火攻之

風濕脈浮身重汗出惡風者防已湯主之

病人喘頭疼鼻塞而煩其脈大自能飲食腹中和無病病在

頭中寒濕故鼻塞內藥鼻中卽愈

論云濕家病身疼痛發熱面黃而喘頭痛鼻塞而煩

傷寒八九日風濕相搏身體疼痛不能自轉側不嘔不渴脈

浮虛而澀者桂枝附子湯主之若其人大便鞭小便自利者

朮附子湯主之

風濕相搏骨節疼痛掣痛不得屈伸近之則痛劇汗出短氣

小便不利惡風不欲去衣或身微腫者甘草附子湯主之

太陽中熱暍是也其人汗出惡寒身熱而渴也白虎湯主之  
太陽中暍身熱疼重而脈微弱此以夏月傷冷水水行皮膚  
中所致也瓜蒂湯主之

太陽中暍發熱惡寒身重而疼痛其脈弦細乳遲小便已酒  
洒然毛聳手足厥冷小有勞身熱日前開板齒燥

○按傷寒論前開二

字倒若發其汗惡寒則甚加溫針則發熱益甚數下之淋復甚

### 平陽毒陰毒百合狐惑脈證第三

陽毒爲病身重腰背痛煩悶不安狂言或走或見鬼或吐血  
下痢其脈浮大數面赤斑斑如錦文咽喉痛唾膿血五日可  
治至七日不可治也有傷寒一二日便成陽毒或服藥吐下  
後變成陽毒升麻湯主之



用藥方  
陰毒爲病身重背強腹中絞痛咽喉不利毒氣攻心心下堅  
強短氣不得息嘔逆脣青面黑四肢厥冷其脈沉細緊數身  
如被打五六日可治至七日不可治也或傷寒初病一二日  
便結成陰毒或服藥六七日以上至十日變成陰毒甘草湯  
主之

百合之爲病其狀常默默欲臥復不能臥或如強健人欲得  
出行而復不能行意欲得食復不能食或有美時或有不  
聞飲食臭時如寒無寒如熱無熱朝至口苦小便赤黃身形  
如和其脈微數百脈一宗悉病各隨證治之

百合病見於陰者以陽法救之見於陽者以陰法救之見陽  
攻陰復發其汗此爲逆其病難治見陰攻陽乃復下之此亦

爲逆其病難治

千金方云見在於陰而攻其陽則陰不得解也復發其汗爲逆也見在於陽而攻其陰則

陽不得解也復下之其病不愈

狐惑爲病其氣如傷寒默默欲眠目不得閉臥起不安蝕於  
喉爲惑蝕於陰爲狐狐惑之病並不欲飲食聞食臭其面目  
乍赤乍白乍黑其毒蝕於上者則聲喝其毒蝕於下部者則  
咽乾蝕於上部瀉心湯主之蝕於下部苦參湯淹洗之食於  
肛者雄黃熏之

喝一作嘔

其人脈數無熱微煩默默欲臥汗出初得三四日目赤如鳩  
眼得之七八日目四眦黃黑若能食者膿已成也赤小豆當  
歸散主之

病人或從呼吸上蝕其咽或從下膈蝕其肛陰蝕上爲惑蝕

下爲狐狐惑病者猪苓散主之

平霍亂轉筋脈證第四

問曰病有霍亂者何師曰嘔吐而利此爲霍亂

問曰病者發熱頭痛身體疼惡寒而復吐利當屬何病師曰當爲霍亂霍亂吐利止而復發熱也傷寒其脈微澀本是霍亂今是傷寒却四五日至陰經上轉入陰必吐利

轉筋爲病其人臂脚直脈上下行微弦轉筋入腹雞屎白散主之

平中風歷節脈證第五

夫風之爲病當半身不遂或但臂不遂者此爲痺脈微而數

中風使然

頭痛脈滑者中風風脈虛弱也

寸口脈浮而緊緊則爲寒浮則爲虛虛寒相搏邪在皮膚浮者血虛絡脈空虛賊邪不瀉或左或右邪氣反緩正氣則急正氣引邪喎僻不遂邪在於絡肌膚不仁邪在於經則重不勝邪入於腑則不識人邪入於藏舌卽難言口吐涎

○按金匱

要略無  
淤字

寸口脈遲而緩遲則爲寒緩則爲虛榮緩則爲亡血衛遲則爲中風邪氣中經則身癢而癢癢心氣不足邪氣入中則胃滿而短氣

趺陽脈浮而滑滑則穀氣實浮則汗自出

少陰脈浮而弱弱則血不足浮則爲風風血相搏則疼痛如

掣

盛人脈濇小短氣自汗出歷節疼不可屈伸此皆飲酒汗出當風所致也

寸口脈沉而弱沉則主骨弱則主筋沉則爲腎弱則爲肝汗出入水中如水傷心歷節黃汗出故曰歷節也

味酸則傷筋筋傷則緩名曰泄鹹則傷骨骨傷則痿名曰枯枯泄相搏名曰斷泄榮氣不通衛不獨行榮衛俱微三焦無所御四屬斷絕身體羸瘦獨足腫大黃汗出脛冷假令發熱便爲歷節也病歷節疼痛不可屈伸烏頭湯主之

諸肢節疼痛身體魁癭

按金匱作疰羸

腳腫如脫頭眩短氣溫溫

欲吐桂枝芍藥知母湯主之

平血痺虛勞脈證第六

問曰血痺從何得之師曰夫尊榮人骨弱肌膚盛重因疲勞

汗出卧不時動搖加被微風遂得之形如風狀

巢原云其狀如被微風所

吹但以脈自微潛<sub>在寸口關上小緊宜鍼引陽氣令脈和緊</sub>

去則愈

血痺陰陽俱微寸口關上微尺中小緊外證身體不仁如風狀黃芪桂五物湯主之

男子平人脈大爲勞極虛亦爲勞

男子勞之爲病其脈浮大手足煩熱春夏劇秋冬差陰寒精自出足酸削不能行少陰虛滿

人年五六十其病脈大者痺俠背行苦腸鳴馬刀俠癭者

皆爲勞得之

男子平人脈虛弱細微者喜盜汗出也

男子面色薄者主渴及亡血卒喘悸其脈浮者裏虛也

男子脈虛沉弦無寒熱短氣裏急小便利面色白時時目瞑此人喜衄少腹滿此爲勞使之然

男子脈微弱而澀爲無子精氣清冷

夫失精家少腹弦急陰頭寒目眶痛

一云目眩

髮落脈極虛芤遲

爲清穀亡血失精

脈得諸芤動微緊男子失精女子夢交通桂枝加龍骨牡蠣湯主之

脈沉小遲名脫氣其人疾行則喘喝手足逆寒腹滿甚則溏

泄食不消化也

脈弦而大弦則爲減大則爲芤減則爲寒芤則爲虛寒虛相搏此名爲革婦人則半產漏下男子則亡血失精

平消渴小便利淋脈證第七

師曰厥陰之爲病消渴氣上衝心中疼熱飢而不欲食食卽吐下之不肯止

寸口脈浮而遲浮則爲虛遲則爲勞虛則衛氣不足遲則榮氣竭趺陽脈浮而數浮則爲氣數則消穀而緊要略緊作大堅氣盛則洩數洩數則緊要略緊作堅緊數相搏則爲消渴

男子消渴小便反多以飲一斗小便一斗腎氣丸主之

師曰熱在

一作結

下焦則溺血亦令人淋閉不通淋之爲病小



便如粟狀少腹弦急痛引臍中

寸口脈細而數數則爲熱細則爲寒數爲強吐趺陽脈數胃中有熱則消穀引食大便必堅小便則數少陰脈數婦人則陰中生瘡男子則氣淋

淋家不可發汗發汗則必便血

### 平水氣黃汗氣分脈證第八

師曰病有風水有皮水有正水有石水有黃汗風水其脈自浮外證骨節疼痛其人惡風皮水其脈亦浮外證跗腫按之沒指不惡風其腹如鼓如鼓一作如故不滿不渴當發其汗正水其脈沉遲外證自喘石水其脈自沉外證腹滿不喘黃汗其脈沉遲身體發熱胸滿四肢頭面腫久不愈必致癰膿

脈浮而洪浮則爲風洪則爲氣風氣相搏風強則爲癰癰身  
體爲癢癢爲泄風久爲痂癩氣強則爲水難以俛仰風氣相  
擊身體洪腫汗出乃愈惡風則虛此爲風水不惡風者小便  
通利上腭有寒其口多涎此爲黃汗

寸口脈沉滑者中有水氣面目腫大有熱名曰風水視人之  
目裏上微擁如新臥起狀其頸脈動時時欬按其手足上陷  
而不起者風水太陽病脈浮而緊法當骨節疼痛而反不痛  
身體反重而酸其人不渴汗出卽愈此爲風水惡寒者此爲  
極虛發汗得之渴而不惡寒者此爲皮水身腫而冷狀如周  
痺胷中空不能食反聚痛暮躁不眠此爲黃汗痛在骨節欬  
而喘不渴者此爲脾脹其形如腫發汗卽愈然諸病此者渴

而下利小便數者皆不可發汗

風水其脈浮浮爲在表其人能食頭痛汗出表無他病病者言但下重故從腰以上爲和腰以下當腫及陰難以屈伸防

已黃耆湯主之

一云風水脈浮身重汗出惡風者防已黃耆湯主之

風水惡風一身悉腫脈浮不渴續自汗出而無大熱者越婢湯主之

師曰裏水者一身面目洪腫其脈沉小便不利故令病水假

如小便自利亡津液故令渴也越婢加朮湯主之

一云皮水其脈沉頭

面浮腫小便不利故令病水假如小便自利亡津液故令渴也

皮水之爲病四肢腫水氣在皮膚中四肢聶聶動者防已茯苓湯主之

苓湯主之

跌陽脈當伏今反緊本自有寒疝瘕腹中痛醫反下之下之則胸滿短氣

跌陽脈當伏今反數本自有熱消穀一作消渴小便數今反不利

此欲作水

寸口脈浮而遲浮脈熱遲脈潛熱潛相搏名曰沉跌陽脈浮而數浮脈熱數脈止熱止相搏名曰伏沉伏相搏名曰水沉則絡脈虛伏則小便難虛難相搏水走皮膚則爲水矣

寸口脈弦而緊弦則衛氣不行衛氣不行則惡寒水不沾流走在腸間

少陰脈緊而沉緊則爲痛沉則爲水小便卽難師曰脈得諸沉者當責有水身體腫重水病脈出者死

夫水病人目下有臥蠶面目鮮澤脈伏其人消渴病水腹大  
小便不利其脈沉絕者有水可下之

問曰病下利後渴飲水小便不利腹滿陰腫者何也荅曰此  
法當病水若小便自利及汗出者自當愈

水之爲病其脈沉小屬少陰浮者爲風無水虛脹者爲氣水  
發其汗卽已沉者與附子麻黃湯浮者與杏子湯

心水者其身重而少氣不得臥煩而躁其陰大腫

肝水者其腹大不能自轉側脇下腹中痛時時津液微生小  
便續通

肺水者其身腫小便難時時鴨蹠

脾水者其腹大四肢苦重津液不生但苦少氣小便難

腎水者其腹大臍腫腰痛不得溺陰下濕如牛鼻上汗其足

逆冷面皮瘦

一云大便反堅

師曰諸有水者腰以下腫當利小便腰以上腫當發汗乃愈  
師曰寸口脈沉而遲沉則爲水遲則爲寒寒水相搏趺陽脈  
伏水穀不化脾氣衰則驚漉胃氣衰則身腫少陽脈卑少陰  
脈細男子則小便不利婦人則經水不通經爲血血不利則  
爲水名曰血分

一云水分

問曰病者若水面目身體四肢皆腫小便不利師脈之不言  
水反言胃中痛氣上衝咽狀如炙肉當微欬喘審如師言其  
脈何類師曰寸口脈沉而緊沉爲水緊爲寒沉緊相搏結在  
關元始時當微年盛不覺陽衰之後榮衛相干陽損陰盛結

寒微動緊氣上衝咽喉塞噎脇下急痛醫以爲留飲而大下  
之氣擊不去其病不除後重吐之胃家虛煩咽燥欲飲水小  
便不利水穀不化面目手足浮腫又與葶藶九下水當時如  
小差食飲過度腫復如前胸脇苦痛象若奔豚其水揚溢則  
浮欬喘逆當先攻擊衝氣令止乃治欬欬止其喘自差先治  
新病病當在後

黃汗之病身體洪腫

一作重

發熱汗出而渴

而渴一作不渴

狀如風水

汗沾衣色正黃如蘗汁其脈自沉

問曰黃汗之病從何得之師曰以汗出入水中浴水從汗孔  
入得之黃耆芍藥桂枝苦酒湯主之

黃汗之病兩脛自冷假令發熱此屬歷節食已汗出又身常

暮臥盜汗出者此榮氣也若汗出已反發熱者久久其身必  
甲錯發熱不止者必生惡瘡若身重汗出已輒輕者久久必  
身瞶瞶則胃中痛又從腰以上必汗出下無汗腰寬馳痛如  
有物在皮中狀劇者不能食身疼重煩躁小便不利此爲黃  
汗桂枝加黃耆湯主之

寸口脈遲而濇遲則爲寒濇爲血不足趺陽脈微而遲微則  
爲氣遲則爲寒寒氣不足則手足逆冷手足逆冷則榮衛不  
利榮衛不利則腹滿脇鳴相逐氣轉膀胱榮衛俱勞陽氣不  
通則身冷陰氣不通則骨疼陽氣前通則惡寒陰氣前通則  
痺不仁陰陽相得其氣乃行大氣一轉其氣乃散實則失氣  
虛則遺溺名曰氣分



月系卷一  
三  
氣分心下堅大如盤邊如旋杯水飲所作桂枝去芍藥加麻黃細辛附子湯主之

心下堅大如盤邊如旋盤水飲所作枳實朮湯主之

平黃疸寒熱瘧脈證第九

凡黃候寸口脈近掌無脈口鼻冷並不可治

脈沉渴欲飲水小便不利者皆發黃

腹滿舌痿黃躁不得睡屬黃家

師曰病黃疸發熱煩喘胸滿口燥者以發病時火劫其汗兩熱所得然黃家所得從濕得之一身盡發熱而黃肚熱熱在裏當下之

師曰黃疸之病當以十八日爲期治之十日以上爲差反劇

爲難治

又曰疸而渴者其疸難治疸而不渴者其疸可治發於陰部其人必嘔發於陽部其人振寒而發熱也

師曰諸病黃家但利其小便假令脈浮當以汗解之宜桂枝加黃耆湯又男子黃小便自利當與小建中湯

黃疸腹滿小便不利而赤自汗出此爲表和裏實當下之宜大黃黃蘗梔子芒消湯

黃疸病小便色不變欲自利腹滿而喘不可除熱熱除必噦噦者小半夏湯主之

夫病酒黃疸必小便不利其候心中熱足下熱是其證也心中懊懣而熱不能食時欲吐名曰酒疸

酒黃疸者或無熱靖言了了腹滿欲吐鼻燥其脈浮者先吐之沉弦者先下之

酒疸心中熱欲嘔者吐之卽愈

酒疸黃色心下結實而煩

酒疸下之久久爲黑疸目青面黑心中如噉蒜虀狀大便正黑皮膚爪之不仁其脈浮弱雖黑微黃故知之

寸口脈微而弱微則惡寒弱則發熱當發不發骨節疼痛當煩不煩而極汗出趺陽脈緩而遲胃氣反強少陰脈微微則傷精陰氣寒冷少陰不足穀氣反強飽則煩滿滿則發熱客熱消穀發已復飢熱則腹滿微則傷精穀強則瘦名曰穀寒

熱

陽明病脈遲者食難用飽飽則發煩頭眩者必小便難此欲作穀疸雖下之腹滿如故所以然者脈遲故也

師曰寸口脈浮而緩浮則爲風緩則爲痺痺非中風四肢苦煩脾色必黃瘀熱以行

跌陽脈緊而數數則爲熱熱則消穀緊則爲寒食卽滿也尺脈浮爲傷腎跌陽脈緊爲傷脾風寒相搏食穀則眩穀氣不消胃中苦濁濁氣下流小便不通陰被其寒熱流膀胱身體盡黃名曰穀疸

額上黑微汗出手足中熱薄暮則發膀胱急小便自利名曰女勞疸腹如水狀不治

黃家日晡所發熱而反惡寒此爲女勞得之膀胱急少腹滿

身盡黃額上黑足下熱因作黑疸其腹脹如水狀大便必黑時瘡此女勞之病非水也腹滿不可治消石礬石散主之夫瘡脈自弦也弦數者多熱弦遲者多寒弦小緊者可下之弦遲者可溫藥若脈緊數者可發汗鍼灸之浮大者可吐之脈弦數者風發也以飲食消息止之

瘡病結爲癥瘕名曰瘡母鼈甲煎丸主之

瘡但見熱者溫瘡也其脈平身無寒但熱骨節疼煩時嘔朝發暮解暮發朝解名曰溫瘡白虎加桂枝湯主之瘡多寒者牡瘡也蜀漆散主之

平胃痺心痛短氣賁豚脈證第十

師曰夫脈當取太過與不及陽微陰弦則胸痺而痛所以然

者責其極虛也今陽虛知在上膻所以胸痺心痛者以其脈陰弦故也

胃痺之病喘息欬唾胃背痛短氣寸口脈沉而遲關上小緊數者枯蕤薤白白酒湯主之

平人無寒熱短氣不足以息者實也

賁豚病者從小腹起上衝咽喉發作時欲死復止皆從驚得  
其氣上衝胃腹痛及往來寒熱賁豚湯主之

師曰病有賁豚有吐膿有驚怖有火邪此四部病皆從驚發得之

平腹滿寒疝宿食脈證第十一

趺陽脈微弦法當腹滿不滿者必下部閉塞大便難兩胕

脚疼痛此虛寒從下上也當以溫藥服之

病者腹滿按之不痛爲虛痛者爲實可下之舌黃未下者下之黃自去

腹滿時減減復如故此爲寒當與溫藥

趺陽脈緊而浮緊則爲痛浮則爲虛虛則腸鳴緊則堅滿脈雙弦而遲者必心下堅脈大而緊者陽中有陰也可下之病腹中滿痛爲實當下之

腹滿不減減不足言當下之

病腹滿發熱數十日脈浮而數飲食如故厚朴三物湯主之腹滿痛厚朴七物湯主之

寸口脈遲而緩遲則爲寒緩則爲氣氣寒相搏轉絞而痛

寸口脈遲而澁遲爲寒澁爲無血

夫中寒家喜欠其人清涕出發熱色和者善嚏

中寒其人下利以裏虛也欲嚏不能此人肚中寒

一作痛

夫瘦人繞臍痛必有風冷穀氣不行而反下之其氣必衝不衝者心下則痞

寸口脈弦者則脇下拘急而痛其人噤噤惡寒也

寸口脈浮而滑頭中痛

趺陽脈緩而遲緩則爲寒遲則爲虛虛寒相搏則欲食溫假令食冷則咽痛

寸口脈微尺中緊而澁緊則爲寒微則爲虛澁則血不足故知發汗而復下之也緊在中央知寒尙在此本寒氣何爲發



汗復下之耶

夫脈浮而緊乃弦狀如弓弦按之不移脈數弦者當下其寒脇下偏痛其脈緊弦此寒也以溫藥下之宜大黃附子湯寸口脈弦而緊弦則衛氣不行衛氣不行則惡寒緊則不欲食弦緊相搏則爲寒疝

跌陽脈浮而遲浮則爲風虛遲則爲寒疝寒疝繞臍痛若發則自汗出手足厥寒其脈沉弦者大烏頭湯主之

問曰人病有宿食何以別之師曰寸口脈浮大按之反澁尺中亦微而澁故知有宿食

寸口脈緊如轉索左右無常者有宿食

寸口脈緊卽頭痛風寒或腹中有宿食不化

脈滑而數者實也有宿食當下之

下痢不欲食者有宿食當下之

大下後六七日不大便煩不解腹滿痛此有燥屎也所以然者本有宿食故也

宿食在上管當吐之

平五藏積聚脈證第十二

問曰病有積有聚有繫氣

繫一作穀下同

何謂也師曰積者藏病也

終不移聚者腑病也發作有時展轉痛移為可治繫氣者脇

下痛按之則愈愈復發為繫氣夫病已愈不得復發今病復

發即為繫氣也

諸積大法脈來細而附骨者乃積也

細一作結

寸口積在胃中微

出寸口積在喉中關上積在臍傍上關上積在心下微下關  
積在少腹尺積在氣街脈出在左積在左脈出在右積在右  
脈兩出積在中央各以其部處之

診得肺積脈浮而毛按之辟易脇下氣逆背相引痛少氣善  
忘目瞑皮膚寒秋差夏劇主皮中時痛如蝨緣之狀甚者如  
針刺時癢其色白

診得心積脈沉而芤上下無常處病胷滿悸腹中熱面赤噤  
乾心煩掌中熱甚卽唾血主身癢癢主血厥夏差冬劇其色  
赤

診得脾積脈浮大而長飢則減飽則見臍起與穀爭減心下  
累累如桃李起見於外腹滿嘔泄腸鳴四肢重足脛腫厥不

能臥是主肌肉損其色黃

診得肝積脈弦而細兩脇下痛邪走心下足腫寒脇痛引小腹男子積疝女子瘕淋身無膏澤喜轉筋爪甲枯黑春差秋劇其色青

診得腎積脈沉而急苦脊與腰相引痛飢則見飽則減少腹裏急口乾咽腫傷爛目眈眈骨中寒主髓厥善忘其色黑寸口脈沉而橫者脇下及腹中有橫積痛其脈弦腹中急痛腰背痛相引腹中有寒疝瘕

脈弦緊而微細者瘕也夫寒痺瘕瘕積聚之脈皆弦緊若在心下卽寸弦緊在胃管卽關弦緊在臍下卽尺弦緊

一日關脈弦長

有積在臍左右上下也

又脈癥法左手脈橫癥在左右手脈橫癥在右脈頭大者在上頭小者在下

又法橫脈見左積在右見右積在左偏得洪實而滑亦爲積  
弦緊亦爲積爲寒痺爲疝痛

內有積不見脈難治見一脈相應爲易治諸不相應爲不治  
左手脈大右手脈小上病在左脅下病在左足右手脈大左  
手脈小上病在右脇下病在右足

脈弦而伏者腹中有癥不可轉也必死不治

脈來細而沉時直者身有癰腫若腹中有伏梁  
脈來小沉而實者胃中有積聚不下食食卽吐

平驚悸衄吐下血胃滿瘀血脈證第十三

寸口脈動而弱動則爲驚弱則爲悸

趺陽脈微而浮浮則胃氣虛微則不能食此恐懼之脈憂迫所作也驚生病者其脈止而復來其人目睛不了了

○按吳本云其

人目睛不轉不能呼氣

寸口脈緊趺陽脈浮胃氣則虛寸口脈緊寒之實也寒在上  
膈胃中必滿而噫胃氣虛者趺陽脈浮少陽脈緊心下必悸  
何以言之寒水相搏二氣相爭是以悸

脈得諸溫濡弱爲亡血

寸口脈弦而大弦則爲減大則爲芤減則爲寒芤則爲虛寒  
虛相搏此名爲革婦人則半產漏下男子則亡血

亡血家不可攻其表汗出則寒慄而振

問曰病衄連日不止其脈何類師曰脈來輕輕在肌肉尺中

自溢

一云尺脈浮

目睛暈黃衄必未止暈黃去目睛慧了知衄今

止

師曰從春至夏發衄者太陽從秋至冬發衄者陽明

寸口脈微弱尺脈澀弱則發熱澀爲無血其人必厥微嘔夫厥當眩不眩而反頭痛痛爲實下虛上實必衄也

太陽脈大而浮必衄吐血

病人面無血色無寒熱脈沉弦者衄也

衄家不可發其汗汗出必額上促急而緊直視而不能眴不得眠

脈浮弱手按之絕者下血煩欬者必吐血

寸口脈微而弱氣血俱虛男子則吐血女子則下血嘔吐汗出者爲可

跌陽脈微而弱春以胃氣爲本吐利者爲可不者此爲有水氣其腹必滿小便則難

病人身熱脈小絕者吐血若下血婦人亡經此爲寒脈遲者胃上有寒噫氣喜唾

脈有手陽跌陽少陰脈皆微其人不吐下必亡血

脈沉爲在裏榮衛內結胃滿必吐血

男子盛大其脈手陽微跌陽亦微獨少陰浮大必便血而失精設言淋者當小便不利

跌陽脈弦必腸痔下血



病人胸滿脣痿舌青口燥其人但欲漱水不欲咽無寒熱脈微大來遲腹不滿其人言我滿爲有瘀血當出汗不出內結亦爲瘀血病者如熱狀煩滿口乾燥而渴其脈反無熱此爲陰伏是瘀血也當下之

下血先見血後見便此近血也先見便後見血此遠血也

平嘔吐噦下利脈證第十四

嘔而脈弱小便復利身有微熱見厥者難治

趺陽脈浮者胃氣虛寒氣在上暖氣在下二氣相爭但出不入其人卽嘔而不得食恐怖而死寬緩卽差

夫嘔家有癰膿者不可治嘔膿盡自愈

先嘔却渴者此爲欲解先渴却嘔者爲水停心下此屬飲家

嘔家本渴今反不渴者以心下有支飲也

問曰病人脈數數爲熱當消穀引食而反吐者何也師曰以發其汗令陽微膈氣虛脈乃數數爲客熱不能消穀胃中虛冷故吐也

陽緊陰數其人食已卽吐陽浮而數亦爲吐

寸緊尺澁其人胃滿不能食而吐吐止者爲下之故不能食設言未止者此爲胃反故尺爲之微澀也

寸口脈緊而芤緊則爲寒芤則爲虛虛寒相搏脈爲陰結而遲其人則噎關上脈數其人則吐

脈弦者虛也胃氣無餘朝食暮吐變爲胃反寒在於上醫反下之今脈反弦故名曰虛

跌陽脈微而澀微則下利澀則吐逆穀不得入也

寸口脈微而數微則無氣無氣則榮虛榮虛則血不足血不足則胃中冷跌陽脈浮而澀浮則爲虛澀則傷脾脾傷則不磨朝食暮吐暮食朝吐宿穀不化名曰胃反脈緊而澀其病難治

夫吐家脈來形狀如新臥起

病人欲吐者不可下之

嘔吐而病在膈上後思水者解急與之思水者猪苓散主之噦而腹滿視其前後知何部不利利之卽愈

夫六腑氣絕於外者手足寒上氣腳縮五臟氣絕於內者下利不禁下甚者手足不仁

下利脈沉弦者下重其脈大者爲未止脈微弱數者爲欲自止雖發熱不死

脈滑按之虛絕者其人必下利

下利有微熱其人渴脈弱者今自愈

下利脈數若微發熱汗自出者自愈設脈復緊爲未解

下利寸脈反浮數尺中自澀其人必清膿血

下利手足厥無脈灸之不溫若脈不還反微喘者死

少陰負趺陽者爲順也

下利脈數而浮

一作渴

者今自愈設不差其人必清膿血以有

熱故也

下利後脈絕手足厥冷晬時脈還手足溫者生脈不還者死

下利脈反弦發熱身汗者自愈

下利氣者當利其小便

下利清穀不可攻其表汗出必脹滿其藏寒者當溫之

下利脈沉而遲其人面少赤身有微熱

千金方連下文

下利清穀必鬱冒汗出而解其人微厥所以然者其面戴陽

下虛故也

下利腹脹滿身體疼痛先溫其裏乃攻其表

下利脈遲而滑者實也利未欲止當下之

下利脈反滑者當有所去下乃愈

下利差至其年月日時復發此爲病不盡當復下之

下利而譫語者爲有燥屎也宜下之

下利而腹痛滿爲寒實當下之

下利腹中堅者當下之

下利後更煩按其心下濡者爲虛煩也

下利後脈三部皆平按其心下堅者可下之

下利脈浮大者虛也以強下之故也設脈浮革因爾腸鳴當溫之

病者痿黃躁而不渴胃中寒實而下利不止者死

夫風寒下者不可下之下之後心下堅痛脈遲者爲寒但當溫之脈沈緊下之亦然脈大浮弦下之當已

平肺痿肺癰欬逆上氣淡飲脈證第十五

問曰熱在上瞋者因欬爲肺痿肺癰之病從何得之師曰或

從汗出或從嘔吐或從消渴小便利數或從便難數被駛藥下利重亡津液故得之

寸口脈不出而反發汗陽脈早索陰脈不澀三焦踰入而不出陰脈不澀身體反冷其內反煩多吐脣燥小便反難此爲肺痿傷於津液便如爛瓜亦如豚腦但坐發汗故也

肺痿其人欲欬不得欬欬則出乾沫久久小便不利甚則脈浮弱

肺痿吐涎沫而不欬者其人不渴必遺溺小便數所以然者以上虛不能制下也此爲肺中冷必眩多涎唾甘草乾薑湯以溫其藏

師曰肺痿欬唾咽燥欲飲水者自愈自張口者短氣也欬而

口中自有津液舌上胎滑此爲浮寒非肺痿也

問曰寸口脈數其人欬口中反有濁唾涎沫者何也師曰此爲肺痿之病若口中辟辟燥欬則胃中隱隱痛脈反滑數此爲肺癰欬唾膿血脈數虛者爲肺痿脈數實者爲肺癰

問曰病欬逆脈之何以知此爲肺癰當有膿血吐之則死後竟吐膿死其脈何類師曰寸口脈微而數微則爲風數則爲熱微則汗出數則惡寒風中於衛呼氣不入熱過於榮吸而不出風傷皮毛熱傷血脈風舍於肺其人則欬口乾喘滿咽燥不渴多唾濁沫時時振寒熱之所過血爲凝滯蓄結癰膿吐如米粥始萌可救膿成則死

欬而胃滿振寒脈數咽乾不渴時時出濁唾腥臭久久吐膿



如粳米粥者爲肺癰桔梗湯主之

肺癰胃滿脹一身面目浮腫鼻塞清涕出不聞香臭酸辛欬逆上氣喘鳴迫塞葶藶大棗瀉肺湯主之

寸口脈數跌陽脈緊寒熱相搏故振寒而欬跌陽脈浮緩胃氣如經此爲肺癰

問曰振寒發熱寸口脈滑而數其人飲食起居如故此爲癰腫病醫反不知而以傷寒治之應不愈也何以知有膿膿之所在何以別知其處師曰假令膿在胃中者爲肺癰其人脈數欬唾有膿血設膿未成其脈自緊數緊去但數膿爲已成也

夫病吐血喘咳上氣其脈數有熱不得臥者死

上氣面浮腫肩息其脈浮大不治又加利尤甚

上氣躁而喘者屬肺脹欲作風水發汗則愈

一二云欬而上氣肺脹其脈沉心

下有水氣也要畧千金外臺沉作浮

夫酒客欬者必致吐血此坐極飲過度所致也

欬家脈弦爲有水可與十棗湯下之

欬而脈浮其人不欬不食如是四十日乃已

十一云三日

欬而時發熱脈卒弦者非虛也此爲胃中寒實所致也當吐之

欬家其脈弦欲行吐藥當相人強弱而無熱乃可吐之其脈沉者不可發汗

久欬數歲其脈弱者可治實大數者不可治其脈虛者必苦

胃其人本有支飲在胃中故也治屬飲家

問曰夫飲有四何謂也師曰有淡飲

一云留飲

有懸飲有溢飲有

支飲問曰四飲何以爲異師曰其人素盛今瘦水走腸間漑漑有聲謂之淡飲飲後水流在脇下欬唾引痛謂之懸飲飲水流行歸於四肢當汗出而不汗出身體疼重謂之溢飲欬逆倚息短氣不得臥其形如腫謂之支飲

留飲者脇下痛引缺盆欬轉甚

一云輒已

胃中有留飲其人短氣而渴四肢歷節痛其脈沉者有留飲夫心下有留飲其人背寒冷大如手

病者脈伏其人欲自利者反快雖利心下續堅滿此爲留飲欲去故也甘遂半夏湯主之

病淡飲者當以溫藥和之

心下有淡飲胃脇支滿目眩甘草

草一作遂

湯主之

病溢飲者當發其汗小青龍湯主之

支飲亦喘而不能臥加短氣其脈平也

膈間支飲其人喘滿心下痞堅面色黧黑其脈沉緊得之數  
十日醫吐下之不愈木防已湯主之

心下有支飲其人苦冒眩澤瀉湯主之

嘔家本渴渴者爲欲解今反不渴心下有支飲故也小半夏  
湯主之

夫有支飲家欬煩胃中痛者不卒死至一百日或一歲可與  
十棗湯

膈上有病滿喘欬吐發則寒熱背痛腰疼自泣自出

目位自出一作

目眩其人振振身瞤劇必有伏飲

夫病人飲水多必暴喘滿凡食少飲多心下水停甚者則悸微者短氣

脈雙弦者寒也皆大下後喜虛脈偏弦者飲也肺飲不弦但喜喘短氣

病人一臂不遂時復轉移在一臂其脈沉細非風也必有飲在上瞧其脈虛者爲微勞榮衛氣不周故也久久自差

差

冬自云

腹滿口苦乾燥此腸間有水氣也防已椒目葶藶大黃丸主之

假令瘦人臍下悸吐涎沫而癰眩者水也五苓散主之  
先渴却嘔爲水停心下此屬飲家半夏加茯苓湯主之

水在心心下堅築短氣惡水不欲飲水在肺吐涎沫欲飲水  
水在脾少氣身重水在肝脇下支滿噎而痛水在腎心下悸

### 平癰腫腸癰金瘡侵淫脈證第十六

脈數身無熱內有癰也

一云腹無積聚身無熱脈數此爲腸有膿薏苡附子敗醬湯主之

諸浮數脈應當發熱而反洒淅惡寒若有痛處當發其癰

脈微而遲必發熱弱而數爲振寒當發癰腫

脈浮而數身體無熱其形嘿嘿胃中微躁不知痛之所在此

人當發癰腫

脈滑而數數則爲熱滑則爲實滑則主榮數則主衛榮衛相

逢則結爲癰熱之所過則爲膿也

師曰諸癰腫欲知有膿與無膿以手掩腫上熱者爲有膿不熱者爲無膿

問曰官羽林婦病醫脈之何以知婦人腸中有膿爲下之則愈師曰寸口脈滑而數滑則爲實數則爲熱滑則爲榮數則爲衛衛數下降榮滑上升榮衛相干血爲濁敗少腹痛堅小便或澀或時汗出或復惡寒膿爲已成設脈遲緊聚爲瘀血下之則愈

腸癰之爲病其身體甲錯腹皮急按之濡如腫狀

腸癰者少腹腫按之則痛小便數如淋時時發熱自汗出復惡寒其脈遲緊者膿未成可下之當有血脈洪數者膿已成

不可下也大黃牡丹湯主之

問曰寸口脈微而澀法當亡血若從出設不汗者云何荅曰  
若身有瘡破刀器所傷亡血故也

侵淫瘡從口起流向四肢者可治汗四肢流來入口者不可  
治

脈經卷之八終





脈經卷之九

平妊娠分別男女將產諸證第一

平妊娠胎動血分水分吐下腹痛證第二

平產後諸病鬱冒中風發熱煩嘔下利證第三

平帶下絕產無子亡血居經證第四

平鬱冒五崩漏下經閉不利腹中諸病證第五

平咽中如有炙腐喜悲熱入血室腹滿證第六

平陰中寒轉胞陰吹陰生瘡脫下證第七

平婦人病生死證第八

平小兒雜病證第九

平妊娠分別男女將產諸證第一

脈平而虛者乳子法也經云陰搏陽別謂之有子此是血氣和調陽施陰化也診其手少陰脈動甚者妊子也少陰心脈也心主血脈又腎名胞門子戶尺中腎脈也尺中之脈按之不絕法妊娠也三部脈沉浮正等按之無絕者有娠也妊娠初時寸微小呼吸五至三月而尺數也脈滑疾重以手按之散者胎已三月也脈重手按之不散但疾不滑者五月也婦人妊娠四月欲知男女法左疾爲男右疾爲女俱疾爲生

二子

又法得太陰脈爲男得太陽脈爲女太陰脈沉太陽脈浮又法左手沉實爲男右手浮大爲女左右手俱沉實猥生二男左右手俱浮大猥生二女

又法尺脈左偏大爲男右偏大爲女左右俱大產二子大者如寶狀

又法左右尺俱浮爲產二男不爾則女作男生左右尺俱沉爲產二女不爾則男作女生也

又法遣妊娠人面南行還復呼之左迴首者是男右迴首者是女也

又法看上圍時夫從後急呼之左回首是男右回首是女也又法婦人妊娠其夫左乳房有核是男右乳房有核是女也婦人懷妊離經其脈浮設腹痛引腰脊爲今欲生也但離經者不病也

又法婦人欲生其脈離經半夜覺

○按千金方有痛字

日中則生也

平姙娠胎動血分水分吐下腹痛證第二

婦人懷胎一月之時足厥陰脈養二月足少陽脈養三月手  
心主脈養四月手少陽脈養五月足太陰脈養六月足陽明  
脈養七月手太陰脈養八月手陽明脈養九月足少陰脈養  
十月足太陽脈養諸陰陽各養三十日活兒手太陽少陰不  
養者下主月水上爲乳汁活兒養母懷娠者不可灸刺其經  
必墮胎

婦人懷娠三月而渴其脈反遲者欲爲水分復腹痛者必墮  
胎

脈浮汗出者必閉其脈數者必發癰膿五月六月脈數者必  
向壞脈緊者必胞漏脈遲者必腹滿而喘脈浮者必水壞爲

腫

問曰有一婦人年二十所其脈浮數發熱嘔欬時下利不欲食脈復浮經水絕何也師曰法當有娠何以故此虛家法當徵弱而反浮數此爲戴陽陰陽和合法當有娠到立秋熱當自去何以知然數則爲熱熱者是火火是木之子死於未未爲六月位土王火休廢陰氣生秋節氣至火氣當罷熱自除去其病卽愈

師曰乳後三月有所見後三月來脈無所見此便是軀有兒者護之恐病利也何以故懷身陽氣內養乳中虛冷故令兒利

婦人懷娠六月七月脈弦發熱其胎踰腹腹痛惡寒寒者小

腹如扇之狀所以然者子藏開故也當以附子湯溫其藏  
婦人妊娠七月脈實大牢強者生沉細者死

婦人妊娠八月脈實大牢強弦緊者生沉細者死

婦人懷軀六月七月暴下斗餘水其胎必倚而墮此非時孤  
漿預下故也

師曰寸口脈洪而濇洪則爲氣濇則爲血氣動丹田其形卽  
溫濇在於下胎冷若水陽氣胎活陰氣必終欲別陰陽其下  
必殭假令陽終畜然若杯

問曰婦人妊娠病師脈之何以知此婦人雙胎其一獨死其  
一獨生而爲下其死者其病卽愈然後竟免軀其脈何類何  
以別之師曰寸口脈衛氣平調榮氣緩舒陽施陰化精盛有

餘陰陽俱盛故知雙軀今少陰微緊血卽濁凝經養不周胎則偏天小腹冷滿膝臍疼痛腰重起難此爲血痺若不早去害母失胎

師曰婦人有胎腹痛其人不安若胎病不長欲知生死令人摸之如覆杯者則男如肘頭參差起者女也冷在何面冷者爲死溫者爲生

師曰婦人有漏下者有半生後因續下血都不絕者有妊娠下血者假令妊娠腹中痛爲胞漏一作阻膠艾湯主之

婦人妊娠經斷三月而得漏下下血四十日不止胎欲動在於臍上此爲妊娠六月動者前三月經水利時胎也下血者後斷三月衃也所以下血不止者其癥不去故也當下其癥



宜桂枝茯苓丸

問曰婦人病經水斷一二月而反經來今脈反微澁何也師曰此前月中若當下利故令妨經利止月經當自下此非軀也

婦人經自斷而有軀其脈反弦恐其後必大下不成軀也

婦人懷軀七月而不可知時時衄血而轉筋者此爲軀也衄時噓而動者非軀也

脈來近去遠故曰反以爲有軀而反斷此爲有陽無陰故也婦人經月下但爲微少師脈之反言有軀其後審然其脈何類何以別之師曰寸口脈陰陽俱平榮衛調和按之滑浮之則輕陽明少陰各如經法身反洒淅不欲食飲頭痛心亂嘔

噦欲吐呼則微數吸則不驚陽多氣溢陰滑氣盛滑則多實  
六經養成所以月見陰見陽精汁凝胞散散者損墮設復陽  
盛雙妊二胎今陽不足故令激經也

婦人妊娠小便難飲如故當歸貝母苦參丸主之

婦人妊娠有水氣身重小便不利洒洒惡寒起卽頭眩葵子  
茯苓散主之

婦人妊娠宜服當歸散卽易產無疾苦

師曰有一婦人來診

脈一作

自道經斷不來師言一月爲卅二

月爲血三月爲居經是定作軀也或爲血積譬如雞乳子熱  
者爲祿寒者多濁且當須後月復來經當入月幾日來假令  
以七日所來因言且須後月十日所來相問設其主復來者

因脈之脈反沉而濇因問曾經半生若漏下亡血者定爲有軀其人言實有是宜當護之今經微弱恐復不安設言當柰何當爲合藥治之

師曰有一婦人來診自道經斷脈之師曰一月血爲閉二月若有若無三月爲血積譬如雞伏子中寒卽濁中熱卽祿欲令胎壽當治其母挾寒懷子命不壽也譬如雞伏子試取雞一毛拔去覆子不遍中寒者濁今夫人有軀少腹寒手掌反逆柰何得有軀婦人因言當柰何師曰當與溫經湯設與夫家俱來者有軀與父母家俱來者當言寒多久不作軀師曰有一婦人來診因言陰陽俱和調陽氣長陰氣短但出不入去近來遠故曰反以爲有軀偏反血斷斷來幾日假令

審實者因言急當治恐經復下設令宮中人若寡婦無夫曾  
夜夢寐交通邪氣或懷久作癥瘕急當治下服二湯設復不  
愈因言髮湯當中下胎而反不下此何等意邪可使且將視  
赤烏一作赤馬師曰若宮里張氏不差復來相問

臣億等詳此文理脫誤不屬無  
本可校以示闕疑餘皆倣此

師曰脈婦人得平脈陰脈小弱其人渴不能食無寒熱名爲  
軀桂枝主之法六十日當有娠設有醫治逆者却一月加吐  
下者則絕之方在傷寒中

婦人脈平而虛者乳子法也平而微者實奄續法也而反微  
瀉其人不亡血下利而反甚其脈虛但坐乳大兒及乳小兒  
此自其常不能令甚虛竭病與亡血虛等必眩冒而短氣也

師曰有一婦人好裝衣來診而得脈濇因問曾乳子下利乃當得此脈耳曾半生漏下者可設不者經斷三月六月設乳子漏下可爲奄續斷小兒勿乳須利止復來相問脈之

師曰寸口脈微遲尺微於寸寸遲爲寒在上焦但當吐耳今尺反虛復爲強下之如此發胃滿而痛者必吐血少腹痛腰脊痛者必下血

師曰寸口脈微而弱氣血俱虛若下血嘔吐汗出者可不者跌陽脈微而弱春以胃氣爲本吐利者可不者此爲水氣其腹必滿小便則難

婦人常嘔吐而胃反若常喘

一作多唾

其經又斷設來者必少

師曰有一婦人年六十所經水常自下設久得病利少腹堅

滿者爲難治

師曰有一婦人來診言經水少不如前者何也師曰曾更下利若汗出小便利者可何以故師曰亡其津液故令經水少設經下反多於前者當所苦困當言恐大便難身無復汗也師曰寸口脈沈而遲沈則爲水遲則爲寒寒水相搏趺陽脈伏水穀不化脾氣衰則驚澹胃氣衰則身體腫少陽脈卑少陰脈細男子則小便不利婦人則經水不通經爲血血不利則爲水名曰血分一作水分師曰寸口脈沉而數數則爲出沉則爲入出則爲陽實入則爲陰結趺陽脈微而弦微則無胃氣弦則不得息少陰脈沉而滑沉則爲在裏滑則爲實沉滑相搏血結胞門其藏不瀉

經絡不通名曰血分

問曰病有血分何謂也師曰經水前斷後病水名曰血分此病爲難治

問曰病有水分何謂也師曰先病水後經水斷名曰水分此病易治何以故去水其經自當下也

脈濡而弱弱反在關濡反在顛遲在上緊在下遲則爲寒名曰渾陽濁則濕名曰霧緊則陰氣慄脈反濡弱濡則中濕弱則中寒寒濕相持名曰痺腰脊骨節苦煩肌爲不仁此當爲痺而反懷軀遲歸經體重以下脚爲跗腫按之沒指腰冷不仁此爲水懷喘則倚息小便不通緊脈爲嘔血氣無餘此爲水分榮衛乖亡此爲非軀

平產後諸病鬱冒中風發熱煩嘔下利證第三

問曰新產婦人有三病一者病瘧

亦作瘧

二者病鬱冒三者大

便難何謂也師曰新產亡血虛多汗出喜中風故令病瘧何故鬱冒師曰亡血復汗寒多故令鬱冒何故大便難師曰亡津液胃燥故大便難產婦鬱冒其脈微弱嘔不能食大便反堅但頭汗出所以然者血虛而厥厥而必冒冒家欲解必大汗出以血虛下厥孤陽上出故但頭汗出所以生婦喜汗出者亡陰血虛陽氣獨盛故當汗出陰陽乃復所以便堅者嘔不能食也小柴胡湯主之病解能食七八日而更發熱者此爲胃熱氣實承氣湯主之方在傷寒中

婦人產得風續之數十日不解頭微痛惡寒時時有熱心下



月經久不  
堅乾嘔汗出雖久陽旦證續在可與陽旦方在傷寒中桂枝  
是也

婦人產後中風發熱面正赤喘而頭痛竹葉湯主之

婦人產後腹中疝痛可與當歸羊肉湯

師曰產婦腹痛煩滿不得臥法當枳實芍藥散主之假令不  
愈者此爲腹中有乾血著臍下與下瘀血湯

婦人產後七八日無太陽證少腹堅痛此惡露不盡不大便  
四五日跌陽脈微實再倍其人發熱日晡所煩躁者不能食  
譫語利之則愈宜承氣湯以熱在裏結在膀胱也方在傷寒  
中

婦人產中虛煩亂嘔逆安中益氣竹皮大丸主之

婦人熱利重下新產虛極白頭翁加甘草湯主之

千金方又加阿膠

### 平帶下絕產無子亡血居經證第四

師曰婦人帶下六極之病脈浮則爲腸鳴腹滿緊則爲腹中痛數則爲陰中癢洪則生瘡弦則陰疼掣痛

師曰帶下有三門一曰胞門二曰龍門三曰玉門已產屬胞門未產屬龍門未嫁女屬玉門

問曰未出門女有三病何謂也師曰一病者經水初下陰中熱或有當風或有扇者二病者或有以寒水洗之三病者或見丹下驚怖得病屬帶下

師曰婦人帶下九實中事假令得鼠乳之病劇易當劇有期當庚辛爲期餘皆倣此

問曰有一婦人年五十所病但苦背痛時時腹中痛少食多厭喜臍脹其脈陽微關尺小緊形脈不相應願知所說師曰當問病者飲食何如假令病者言我不欲飲食聞穀氣臭者病爲在上臆假令病者言我少多爲欲食不食亦可病爲在中臆假令病者言我自飲食如故病爲在下臆爲病屬帶下當以帶下治之

婦人帶下經水不利少腹滿痛經一月再見土瓜根散主之  
婦人帶下脈浮惡寒漏下者不治

師曰有一婦人將一女子年十五所來診言女子年十四時經水自下今經反斷其母言恐怖師曰言此女爲是夫人親女非耶若親女者當相爲說之婦人因荅曰自是女爾師曰

所以問者無他夫人年十四時亦以經水下所以斷此爲避  
年勿恠後當自下

婦人少腹冷惡寒久年少者得之此爲無子年大者得之絕  
產

師曰脈微弱而澀年少得此爲無子中年得此爲絕產

師曰少陰脈浮而緊緊則疝瘕腹中痛半產而墮傷浮則亡  
血絕產惡寒

師曰肥人脈細胞有寒故令少子其色黃者胃上有寒

婦人少腹硯

音磊切

轉痛而復自解發作無常經反斷膀

胱中結堅急痛下引陰中氣衝者久必兩脇拘急

問曰婦人年五十所病下利數十日不止暮則發熱少腹裏

急痛腹滿手掌熱脣口乾燥何也師曰此病屬帶下何以故  
曾經半產瘀血在少腹中不去何以知之其證脣口乾燥故  
知之當與溫經湯

問曰婦人病下利而經水反斷者何也師曰但當止利經自  
當下勿怪所以利不止而經斷者但下利亡津液故經斷利  
止津液復經自當下

婦人血下咽乾而不渴其經必斷此榮不足本自有微寒故  
不引飲渴而引飲者津液得通榮衛自和其經必復下

師曰寸口脈微而濇微則衛氣不足濇則血氣無餘衛不足  
其息短其形燥血不足其形逆榮衛俱虛言語謬誤跌陽脈  
微而濇微則胃氣虛虛則短氣咽燥而口苦胃熱濇則失液

少陰脈微而遲微則無精遲則陰中寒澹則血不來此爲居經三月一來

師曰脈微血氣俱虛年少者亡血也乳子下利爲可不者此爲居經三月一來

問曰婦人妊娠三月師脈之言此婦人非軀今月經當下其脈何類何以別之師曰寸口脈衛浮而大榮反而弱浮大則氣強反弱則少血孤陽獨呼陰不能吸二氣不停衛降榮竭陰爲積寒陽爲聚熱陽盛不潤經絡不足陰虛陽往一作實故令少血時發洒淅咽燥汗出或溲稠數多唾涎沫此令重虛津液漏泄故知非軀畜煩滿洩月稟一經三月一來陰盛則瀉名曰居經

問曰婦人年五十所一朝而清血二三日不止何以治之師曰此婦人前絕生經水不下今反清血此爲居經不須治當自止經水下常五日止者五日愈  
婦人月經一月再來者經來其脈欲自如常而反微不利不汗出者其經二月必來

平鬱冒五崩漏下經閉不利腹中諸病證第五

問曰婦人病經水適下而發其汗則鬱冒不知人何也師曰經水下故爲裏虛而發其汗爲表復虛此爲表裏俱虛故令鬱冒也

問曰婦人病如癰疾鬱冒一日二十餘發師脈之反言帶下皆如師言其脈何類何以別之師曰寸口脈濡而緊濡則陽

氣微緊則榮中寒陽微衛氣虛血竭疑寒陰陽不和邪氣舍

於榮衛疾

疾一作候

起少年時經水來以合房室移時過度精感

命門開經下血虛百脈皆張中極感陽動微風激成寒因虛  
舍榮衛冷積於丹田發動上衝奔在胃膈津液掩口入涎唾  
涌溢出眩冒狀如厥氣衝髀裏熱粗醫名爲癰灸之因大劇  
問曰婦人病苦氣上衝胃眩冒吐涎沫髀裏氣衝熱師脈之  
不名帶下其脈何類何以別之師曰寸口脈沉而微沉則衛  
氣伏微則榮氣絕陽伏則爲疹陰絕則亡血病當小便不利  
津液閉塞今反小便通微汗出沉變爲寒欬逆嘔沫其肺成  
痿津液竭少亡血損經絡因寒爲血厥手足苦痺氣從丹田  
起上至胃脇沉寒怫鬱於上胃中窒塞氣歷陽部面翕如醉



形體似肥此乃浮虛醫反下之長針復重虛榮衛久發眩冒故知爲血厥也

問曰五崩何等類師曰白崩者形如涕赤崩者形如絳津黃崩者形如爛瓜青崩者形如藍色黑崩者形如衄血也

師曰有一婦人來脈反得微瀼法當吐若下利而言不因言夫人年幾何夫人年七七四十九經水當斷反至今不止以故致此虛也

寸口脈弦而大弦則爲減大則爲芤減則爲寒芤則爲虛寒虛相搏脈則爲革婦人則半產漏下旋覆花湯主之

婦人陷經漏下黑不解膠薑湯主之

婦人經水不利抵當湯主之方在傷寒中

婦人經水閉不利藏堅癖不止中有乾血下白物礬石丸主之

婦人腹中諸疾痛當歸芍藥散主之

一云治懷妊腹中痛

婦人腹中痛小建中湯主之方在傷寒中

一云腹中痛小便利理中湯主之

平咽中如有炙腐喜悲熱入血室腹滿證第六

婦人咽中如有炙腐狀

按金匱腐作齧

半夏厚朴湯主之

婦人藏燥喜悲傷欲哭象如神靈所作數欠甘草小麥湯主

之

婦人中風發熱惡寒經水適來得之七八日熱除脈遲身涼胃膈下滿如結胃狀其人譫語此爲熱入血室當刺期門隨其虛實而取之

婦人中風七八日續有寒熱發作有時經水適斷者此爲熱入血室其血必結故使如瘧狀發作有時小柴胡湯主之方在傷寒中

婦人傷寒發熱經水適來晝日了了暮則譫語如見鬼狀此爲熱入血室無犯胃氣若上二焦必當自愈

二焦字疑。按上二焦者上中

二焦也何疑之有

陽明病下血而譫語此爲熱入血室但頭汗出者當刺期門隨其實而寫之澌然汗出者則愈

婦人少腹滿如敦敦狀

要略云滿而熱。按今本要略與脉經同

小便微難而不

渴生後

生後字疑

者此爲水與血并結在血室大黃甘遂湯主之

平陰中寒轉胞陰吹陰生瘡脫下證第七

婦人陰寒溫中坐藥蛇牀子散主之

婦人著坐藥強下其經目眶爲痛足跟難以踐地心中狀如懸

問曰有一婦人病飲食如故煩熱不得臥而反倚息者何也  
師曰得病轉胞不得溺也何以故師曰此人故肌盛頭舉身  
滿今反羸瘦頭舉中空感一作減胞系了戾故致此病但利小  
便則愈宜服腎氣丸以中有茯苓故也方在虛勞中

師曰脈得浮緊法當身軀疼痛設不痛者當射云何因當射  
言若腸中痛腹中鳴欬者因失便婦人得此脈者法當陰吹  
師曰寸口脈浮而弱浮則爲虛弱則爲血浮則短氣弱則有  
熱而自汗出跌陽脈浮而濇浮則氣滿濇則有寒喜噫吞酸

其氣而下少腹則寒少陰脈弱而微微則少血弱則生風微  
弱相搏陰中惡寒胃氣下泄吹而正喧

師曰胃氣下泄吹而正喧此穀氣之實也膏髮導之

少陰脈滑而數者陰中則生瘡

少陰脈數則氣淋陰中生瘡

婦人陰中蝕瘡爛狼牙湯洗之

婦人藏腫如瓜陰中疼引腰痛者杏仁湯主之

少陰脈弦者白腸必挺核

少陰脈浮而動浮則爲虛動則爲痛婦人則脫下

平婦人病生死證第八

診婦人漏血下赤白日下血數升脈急疾者死遲者生

診婦人漏下赤白不止脈小虛滑者生大緊實數者死

診婦人新生乳子脈沉小滑者生實大堅弦急者死

診婦人疝瘕積聚脈弦急者生虛弱小者死

診婦人新生乳子因得熱病其脈弦小四肢溫者生寒清者死

診婦生產因中風傷寒熱病喘鳴而肩息脈實大浮緩者生  
小急者死

診婦人生產之後寸口脈焱疾不調者死沉微附骨不絕者  
生

金瘡在陰處出血不絕陰脈不能至陽者死接陽而復出者  
生

平小兒雜病證第九

小兒脈呼吸八至者平九至者傷十至者困

診小兒脈法多雀鬪要以三部脈爲主若緊爲風癇沉者乳不消弦急者客忤氣

小兒是其日數應變蒸之時身熱而脈亂汗不出不欲食食輒吐哕者脈亂無苦也

小兒脈沉而數者骨間有熱欲以腹按冷清也

小兒大便赤青瓣殮洩脈小手足寒難已脈小手足溫易已

小兒病困汗出如珠著身不流者死

小兒病其頭毛皆上逆者必死耳間青脈起者瘕痛

小兒病而凶陷入其口脣乾目皮反口中出氣冷足與頭相

抵臥不舉身手足四肢垂其臥正直如得縛其掌中冷皆死  
至十日不可復治之

脈經卷之九終





# 脈經卷之十

## 手檢圖二十一部

○袁校本云凡五十六條首言十二經脈次言奇經入脈次言三部二十

四種脈未見所謂手檢圖者豈經原有圖今不傳耶宋林億云世之傳授其別有三有以隋巢元方時行病源爲第十卷者有以第五卷分上下卷而撮諸篇之文別增篇目者今則除去重復補其脫漏其篇第亦頗改易仍舊爲一十卷則知此卷經文傳疑已久億雖補正脫漏而所謂手檢圖二十一部者直據舊目無從深考耳

經言肺者人之五藏華蓋也上以應天解理萬物主行精氣

法五行

○按奇經攷引有應字

四時知五味寸口之中陰陽交會中有

五部前後左右各有所主上下中央分爲九道浮沉結散知邪所在其道奈何岐伯曰脈大而弱者氣實血虛也脈大而長者病在下候浮直上下交通者陽脈也堅在腎急在肝實

在肺前如外者足太陽也中央如外者足陽明也後如外者足少陽也中央直前者手少陰也中央直中者手心主也中央直後者手太陰也前如內者足厥陰也中央如內者足太陰也後如內者足少陰也前部左右彈者陽蹻也中部左右彈者帶脈也後部左右彈者陰蹻也從少陽之厥陰者陰維也從少陰之太陽者陽維也來大時小者陰絡也來小時大者陽絡也

前如外者足太陽也動苦頭項腰痛浮爲風濇爲寒熱緊爲宿食

前如外者足太陽也動苦目眩頭頸項腰背強痛也男子陰下濕女子月水不利少腹痛引命門陰中痛子藏閉浮爲風

瀦爲寒血滑爲勞熱緊爲宿食針入九分卻至六分

中央如外者足陽明也動苦頭痛面赤微滑苦大便不利腸鳴不能食足脛痺

中央如外者足陽明也動苦頭痛面赤熱浮微滑苦大便不利喜氣滿滑者爲飲瀦爲嗜臥腸鳴不能食足脛痺針入九分却至六分

後如外者足少陽也動苦腰背脰股肢節痛

後如外者足少陽也浮爲氣瀦瀦爲風血急爲轉筋弦爲勞

針入九分却至六分

以上足三陽脉六條

前如內者足厥陰也動苦少腹痛月經不利子藏閉

前如內者足厥陰也動苦少腹痛與腰相連大便不利小便

難莖中痛女子月水不利陰中寒子戶壅絕內少腹急男子  
疝氣兩丸上入淋也針入六分却至三分

中央如內者足太陰也動苦胃中痛食不下欬唾有血足脛  
寒少氣身重從腰上狀如居水中

中央如內者足太陰也動苦腹滿上管有寒食不下病以飲  
食得之沈瀦者苦身重四肢不動食不化煩滿不能臥足脛  
痛苦寒時欬血泄利黃針入六分却至三分

後如內者足少陰也動苦少腹痛與心相引背痛淋從高墮  
下傷於內小便血

後如內者足少陰也動苦少腹痛與心相引背痛淋從高墮  
下傷於尻內便血裏急月水來上搶心胃脇滿拘急股裏急

也針入六分卻至三分

以上足三陰脈六條

前部左右彈者陽蹻也動苦腰背痛微瀼爲風癰取陽蹻

前部左右彈者陽蹻也動苦腰痛癰惡風偏枯僵仆羊鳴

癰痺皮膚身體強

一作淫痺

直取陽蹻在外踝上三寸直絕骨是

中部左右彈者帶脈也動苦少腹痛引命門女子月水不來

絕繼復下止陰辟寒令人無子男子苦少腹拘急或失精也

後部左右彈者陰蹻也動苦癰寒熱皮膚強

一作淫痺

後部左右彈者陰蹻也動苦少腹痛裏急腰及髀窮下相連

陰中痛男子陰疝女子漏下不止

以上陰蹻陽蹻帶脈五條

中央直前者手少陰也動苦心痛微堅腹脇急實堅者爲感

忤純虛者爲下利腸鳴滑者爲有娠女子陰中癢痛痛出玉

門上一分前

中央直中者手心主也動苦心痛面赤食苦咽多喜怒微浮者苦悲傷恍惚不樂也瀉爲心下寒沈爲恐怖如人捕之狀也時寒熱有血氣

中央直後者手太陰也動苦欬逆氣不得息浮爲內風緊瀉者胃中有積熱時欬血也有沉熱

以上手三陰脉三條

從少陰斜至太陽是陽維也動苦肌肉痺癢

從少陰斜至太陽是陽維也動苦顛僵仆羊鳴手足相引甚者失音不能言癰疾直取客主人兩陽維脈在外踝絕骨下

二寸

從少陽斜至厥陰是陰維也動苦癰癰僵仆羊鳴

從少陽斜至厥陰是陰維也動苦僵仆失音肌肉淫癢痺汗出惡風

脈來暫大暫小是陰絡也

一作結

動苦肉痺應時自發身洗洗

也

脈來暫小暫大者是陽絡也

一作結

動苦皮膚痛下部不仁汗

出而寒也

以上陽維陰維陽絡陰絡脈六條

肺脈之來也如循榆葉曰平如風吹毛曰病狀如連珠者死期丙丁日禺中日中

心脈之來也如反筍葉大曰平如連珠曰病前曲後居如帶鈞者死期壬癸日人定夜半

肝脈之來也搏而若曰平如張新弓弦曰病如雞踐地者死



期庚辛日晡時日入

脾脈之來也阿阿如緩曰平來如雞舉足曰病如鳥之啄如水之漏者死期甲乙日平旦日出

腎脈之來也微細以長曰平來如彈石曰病去如解索者死

期戊己日食時日昃黃昏雞鳴

以上平五藏脈五條

寸口中脈躁竟尺關中無脈躁陽干陰也動苦腰背腹痛陰中若傷足寒刺足太陽少陰直絕骨入九分灸太陰五壯

尺中脈堅實竟尺寸口無脈應陰干陽也動苦兩脛腰重少腹痛癰疾刺足太陰踝上三寸針入五分又灸太陽陽蹻在足外踝上三寸直絕骨是也

寸口脈緊直至魚際下小按之如持維干

一作雞毛狀其病腸鳴

足痺痛酸腹滿不能食得之寒濕刺陽維在外踝上三寸間

也入五分此脈出魚

一作際

寸口脈沈著骨反仰其手乃得之此腎脈也動苦少腹痛腰體酸癩疾刺腎俞入七分又刺陰維入五分

初持寸口中脈如細堅狀久按之大而深動苦心下有寒腎脇苦痛陰中痛不欲近丈夫也此陰逆刺期門入六分又刺腎俞入五分可灸胃管七壯

初持寸口中脈如躁狀洪大久按之細而堅牢動苦腰腹相引痛以下至足胫重也不能食刺腎俞入四分至五分亦可灸胃管七壯

尺寸俱沈但有關上脈苦寒心下痛

尺寸俱沈關上無有者苦心下喘

尺寸俱數有熱俱遲有寒

尺寸俱微厥血氣不足其人少氣

尺寸俱濡弱發熱惡寒汗出

一云內慍熱手足逆冷汗出

寸口沈胃中痛引背

一云短氣

關上沈心痛上吞酸尺中沉引背

痛

寸口伏胃中有逆氣關上伏有水氣泄瀉尺中伏水穀不消

寸口弦胃中拘急

一作心下幅幅

關上弦胃中有寒心下拘急尺中

弦少腹臍下拘急

寸口緊頭痛逆氣關上緊心下痛尺中緊臍下少腹痛

寸口濇無陽少氣關上濇無血厥冷尺中濇無陰厥冷

寸口微無陽外寒關上微中實

一作胃虛

能食故裏急

一作無胃氣

尺

中微無陰厥冷腹中拘急

寸口滑胃滿逆關上滑中實逆尺中滑下利少氣

寸口數卽吐關上數胃中有熱尺中數惡寒小便赤黃

寸口實卽生熱虛卽生寒關上實卽痛虛卽脹滿尺中實卽

小便難少腹牢痛虛卽閉澀

寸口芤吐血微芤衄血關上芤胃中虛尺中芤下血微芤小

便血

寸口浮其中風發熱頭痛關上浮腹痛心下滿尺中浮小

便難

寸口遲上膈有寒關上遲胃有寒尺中遲下膈有寒背痛

寸口濡陽弱自汗出關上濡下重尺中濡少血發熱惡寒  
寸弱陽氣少關弱無胃氣尺弱少血

以上雜言三部  
二十四種脈

脈經卷之十終

脈經跋

西晉王叔和取素難以下諸家論脈之文分類編次爲脈經十卷宋林億稱其若網在綱有條不紊使人占外以知內視死而別生可謂推崇之至矣而西昌喻氏則謂於彙脈之間一彙證不該不貫抑知形有盛衰邪有微甚一證恒兼數脈一脈恒兼數證故論證不論脈不備論脈不論證不明王氏彙而編之深得古人微旨又西晉時去古未遠所據醫書皆與今本不同如第七卷云傷寒一二日至四五日厥者必發熱前厥者後必熱今傷寒論誤作前熱者後必厥按厥陰之病乃陽陷入陰而非有陰無陽今雖鬱極而厥然陽邪外達將必復爲發熱也故下文卽云厥深者熱亦深厥微者熱

亦微厥熱二字誤爲顛倒則非其義矣第七卷又云脈浮而緊浮則爲風緊則爲寒風則傷衛寒則傷營營衛俱病骨節煩疼可發其汗宜麻黃湯今傷寒論脫宜麻黃湯四字致後人誤解爲大青龍證按大青龍湯用麻黃以解表石膏以清裏本爲外傷風寒而內伏喝熱者設此條但言風寒而無煩躁之內熱其非大青龍證明矣第八卷云寸口脈遲而緩遲則爲寒緩則爲虛營緩則爲亡血衛遲則爲中風今金匱要略衛遲誤作衛緩按緩與遲相類而實不同遲以至數言緩以脈形言故傷寒論又云陰脈浮大而濡陽脈浮大而濡陰脈與陽脈同等者名曰緩也營緩則爲亡血申明緩則爲虛衛遲則爲中風申明遲則爲寒古書雖一字不容擅易如此

第八卷又云趺陽脈當伏今反數本自有熱消渴小便數今反不利此欲作水今金匱要略消渴誤作消穀按消渴而小便不利則所飲之水無從下泄勢必外走於皮膚分肉之間而爲水證若云消穀何以決其爲水耶他如第二卷云聖人圖設溝渠通利水道以備不虞今難經不虞誤作不然第六卷云足陽明之脈下循鼻外入上齒中今靈樞入上二字誤倒又云其支者下膝三寸而別今靈樞膝誤作廉又云足少陽之脈循足跗上出小指次指之端今靈樞誤作入小指次指之間第七卷云汗出而熱留者壽可立而傾也今素問誤作病而留者甲乙經又誤作熱而留者推尋文義當以脈經爲正第五卷引張仲景論脈二條在傷寒論平脈篇中可證



此篇爲仲景原文又引扁鵲脈法並不見於難經而書中引難經之文又不稱扁鵲曰可見難經不知何人所作新唐書屬之秦越人者妄也醫家不知考古往往舍本逐末此本由叔和裒集而成今去叔和又千餘載古書日漸散佚賴是以略存梗概洵爲醫林中不可多得之書明有吳勉學校本刊入醫統正脈多脫誤不可讀惟袁景從校本稍爲完善然咸以意刪改彌失本真此書不著錄於四庫恐其久而遂亡故彙集諸書重爲校正有粹以續其傳其無古書可證者雖有謬誤因而不革不敢測古人也辛丑重五金山錢熙祚識

